

LA CARTA DEL APÓSTOL SAN PABLO A LOS ROMANOS

Pablo escribe a la iglesia en Roma

1 Nugö dûr Pablo, dí pejpi car Jesucristo. Car Tzi Ta jitzi xí hñixquigö gá jmandadero, xí juanquigö pa gu xij yü cjahni nû ddadyo jñä nû rí hñeh ca Ocja, gue nû i xijquijü ja i ncja da ttajquijü car nzajqui ca jin da tsegue.

2 Ya má yabbü, ya xi mí mân car Tzi Ta jitzi di ddajquijü hnár ddadyo hñü pa gu totíjü car nzajqui-ca. Car tiempo ca xí tjogui, car Tzi Ta jitzi bi xih cü profeta cü mí pejpi, ja di ncja car ddadyo hñü ca di ddajquijü, cja nucü bi jñux pü jar Escritura.

3 Nû ddadyo jñä nû xpá menquijü ca Ocja i xijquijü digue cár Ttu, gue cam Tzi Jmujü Jesucristo. Guegue bi cja úr cjahni, bi hmuy digue cár cji ca ndor rey David. **4** Mûr cjahni car Jesucristo, pe guejtjo mûr Ttu ca Ocja. Dí padijü, úr Ttu ca Ocja guegue, porque bbü ya xquí du, car Tzi Ta jitzi bi cjajpi bi jñä úr já. Bbü mí nantzi car Jesús, nubbü, bi nigui te tza rá nzech car Tzi Ta jitzi. **5** Bi nzojquigö car Jesucristo, úm Tzi Jmujü, bi ddajqui nûr bbefi rá zö nû dí òte. Bi hñixquigö gá jmandadero pa gu xij yü cjahni yü

i bbü göhtjo tema jöy digue nûr mundo. Dí xijmu to guegue cja co te rá nguehcä bú eje, sânta da dyødejü cja da hñeme rá ngu cjahni. **6** Hnêhquiguejü, guí hermanoju gár bbüpju jar ciudad pü Roma, xí nzohquijü cam Tzi Tajü jitzi. Como xcú hñemejü car Jesucristo, ca Ocja xí cjahqui í bajtziquijü.

7 Nuquejü guí hermanoju gár bbüpju pü Roma, dí penquijü nûr carta-nâ göhtjo cü to xí hñeme car Jesucristo. Car Tzi Ta jitzi i mahquijü, xí nzoh quir tzi møyijü, cja xí nguezquijü ca rá ntto ca nguí tujü. Cam Tzi Tajü jitzi cja co cam Tzi Jmujü Jesucristo da möxquijü co cár tzi ntijqui pa gui hmüpju rá zö.

Pablo quiere visitar Roma

8 Bbeto dí ne gu xihquijü nûr palabra-nâ. Dí ndo öjpi mpöjcje cam Tzi Tajü jitzi por rá nguehquejü, como xcú hñemejü cam Tzi Jmujü Jesucristo. Ya xí dyøh cü cjahni cü rá bbüy göhtjo tema parte nûr mundo, nuquejü, xcú hñemejü nûr tzi ddadyo jñä nû dí ma. **9** Dí pejpi ca Ocja göhtjo mbo úm tzi møy, dí xih cü cjahni nûr ddadyo jñä nû i ma ja i ncja cár Tzi Ttu ca Ocja. Bbü

dí nzojcö ca Ocja, dí mbënquijü, dí mahti car Tzi Ta jitzi por rá nguehuequeju. Guegue i padi, cierto na dí xihquijü hua. ¹⁰Ya xí cja tiempo xtú mbení gu ma zenguaquijü tzü. Dí öjpi cam Tzi Taju jitzi da möxqui pa da jogui gu ma pü. ¹¹Como dí ndo ne gu ccajtiquijü, pa gu föxquijü gui zedijü ca guír tenijü car Jesucristo. ¹²Cja jin gui jõña-ca. Dí göhtjoju gu mföxijü pa más gu emejü guegue. Bbü xtí ccajtiquijü, ja ncja dar emegö, xquí zedijü bbü. Cja hnequigö, bbü xtá ccajtiquijü guir zejmü, más gu zecö bbü hneje.

¹³Um cjuadaquijü, dí negö gui padijü, ya xná ngu vez xtú mbení gua ma ccajtiquijü, pe hasta guejya, jin gui tzö ja grá ma. Dí ne gu nzoh cü pé dda cjahni pü jabü gár bbüpü, gu xijmu nar tzi ddadyo jñä digue car Jesucristo, sánta da hñemeju hneje, como ngu gua hñeme cü pé dda cjahni pü jabü xtú hño. ¹⁴Porque ca Ocja xí ddajqui nüm cargo gu nzofo göhtjo cü cjahni, gu xijmu nar ddadyo jñä. Gu nzoh cü cjahni cü i bbü ja ciudad, cja co hnëh cü cjahni cü rá bbü yapü cja i ñajü hnahnö jñä. Guejtjo gu nzoh cü cjahni cü xí nxödi rá ngu cja co hnëh cü jin tza te i padi. ¹⁵Eso, dí ndo pehtzi deseo pa gu ma pü Roma, pü jabü guí bbüpü, ma grí xij nar evangelio cü pé dda mingü pü hneje.

El poder del evangelio

¹⁶Jin dí pehtzi um tzö grá xij yü cjahni nar evangelio, porque dí padi, i yojmi cár ttzedi ca Ocja pa da nzoh quí tzí møy yü cjahni. Göhtjo cü to da hñeme, ca Ocja da

gáhtzibi ca rá nttzo ca i tuju. Parejo da nü göhtjo cü to da hñeme, cü judío, cja co guejti cü cjahni cü jin gui judío. Bbü mbú ecua jar jöy car Jesucristo, guegue mür judío, eso i nesta bbeto da ttzoh cü judío, da tsijimü nar tzi ddadyo jñä na dá ja. ¹⁷Nar tzi ddadyo jñä digue car Jesucristo i xijquijü ja ncja ga nguzquijü ca Ocja ca rá nttzo ca dí tuju. I nesta gu emejü göhtjo mbo um møyü, ca Ocja da dyóte ncja ngu ga ma. Bbü gu emejü ncjapü, ca Ocja da nuguayü ncjahmü jin te gri tuju. Göhtjo ur vida i nesta gu emejü, guegue da dyóte ncja ngu xcá ma. Guehca i mam pü jar Escritura, ina: “Car cjahni ca i eme ca Ocja, göhtjo mbo ur møy, guegue-ca i ccáhti ncjahmü jin te di tu, cja guejtjo i un car nzajqui ca jin da tjegue.”

La culpa de la humanidad

¹⁸Car Tzi Ta ca bí bbü jitzi xí xijquijü da ndo castiga cü cjahni cü jin gui tzüjü guegue cja i otijü ca jin gui tzö. I padijü ja i ncja ca rá zö cja co ja i ncja ca jin gui tzö, pe i segue i otijü ca rá nttzo, ncjahmü jin di emejü, cja i bbüh ca Ocja? o ncjahmü jin di padijü cja cierto da jñanquijü ur huenda guegue? ¹⁹Ca Ocja jin gui nu rá zö cü cjahni cü i otijü ncjapü. Ya xqui padijü i bbü guegue, pe jin gui cajpijü ncaso. Guejtjo ya xqui tzi padijü ja i ncja ca Ocja. Por digue yü dí ccáhtiju hua jar jöy cja co nu jitzi, dí padijü, cierto, i bbüh ca hnaa ca xí dyóte göhtjo-yü. Guejtsje car Tzi Ta jitzi i cjakuijü dí mbeníjü mbo um møyü, cierto i bbü guegue. ²⁰Desde bbü

mí ttóti nár mundo, xí nigui, cierto i bbuh ca Ocja, guegue i mandado göhtjo ur tiempo, cja más rá ndo zö quí mfeni ni ndra ngue cùm mfenijü. Bbu dí ccahtijü göhtjo yü xí dyoti ca Ocja, dí padijü ja i ncja cár ttzédi, masque jin dí ccahtijü guegue. Hasta guejti yü cjahni yü jí bbe i tsjhí cár palabra ca Ocja, jin gui tzö da majmu: "Nim pa xtá padije, cja i bbuh ca Ocja?"

²¹ Macja i padijü, gue ca Ocja xí dyote göhtjo yü dí ccahtijü, pe jin gui ungui í mhyjü da hñihtzibijü o da dyöpjijü mpöjcje por rá ngue yü cosa rá zö yü i bbujcua jar mundo. Lugar digue da mbení ca Ocja, i dabenitjo, i mbení mfeni cü jin te i ntjumü, cja i cjajü dondo. Como jin gui ne da guatijü ca Ocja, pa di yoti cár tzi jiahtzi mbo í mhyjü, más rí wembitjojü, rí hmüjtijü pü jabu rá hmexuy. ²² Gueguejü i majmu, ya xqui ndo padijü rá zö, cja jin gui nesta da jionijü ca Ocja. Eso, más i cjajü dondo. ²³ Masque ya xqui padijü i bbuh ca Ocja, rá ndo zö quí mfeni-cá, cja i mandado göhtjo ur tiempo, pe jin gui ne da guatijü. Xí jiejmü guegue, xí ungui í mhyjü da hñihtzibijü hnahnö cjaá cü jin gui hñani. Nucü, xí ttóte pa da jñejmi hnár cjahni o hnár ttzuntzü, o hnár zuwe ca i dyo jar jöy, i pehtzi yojo quí hua, yojo quí dye, o xí ttóte ncja hnár cciñä.

²⁴ Yü cjahni, como ya xí jiejmü ca Ocja ca ntjumü i bbuy, guejti ca Ocja xí jiej-yü. Eso, xí hñemindo yü cjahni da dyote göhtjo tema cosa ca i mbentsjejü, hasta i mföxitü quí hñohui da dyotihui hmetzö.

²⁵ Masque ya xí mbadijü, i bbuh ca

Ocja, cja guegue-ca xí dyøjquijü cja xí ddajqui um nzajquijü, pe jí xcá ne xcá jionijü guegue. Mejor, xí nguatiyü yü dda cosa yü i bbujcua jar jöy, xí hñihtzibijü ncjahmu Ocja-yü. I ihtzibijü yü cosa yü xí dyoti ca Ocja, pe jin gui ne da hñihtzibijü ca Ocja, cja nuca xí dyote göhtjo yü i bbuy. Rí ntzöhui gu xöjtibijü cja gu ihtzibijü göhtjo ur tiempo. Amén.

²⁶ Eso, ca Ocja xí jiej yü cjahni da dyote göhtjo cü nttzomfeni cü i mbentsjejü. Ncjahmu xí dyembí í mhyjü pa da dyoti cosa cü jí rí ntzöhui da ttóte. I bbe í tzöju. I bbuh cü dda bbejña cü jin gui ne da yojmi quí damejü. Más i tzöjö da hmübi hnár minga-bbejñahui, da intjo ncjahmu dur hñojö. ²⁷ Cja co guejti cü hñojö, i ncjadina car hmetzö ca i ötjü. I bbuh cü ddaa cü jin gui ne da hmübi quí bbejñajü, ncja ngü xcá ddajquijü ca Ocja. Como ya xí ttzon quí mfenijü, i tzöjö da yojmi hnár minga-hñojöhui ncjahmu dur bbejña. Guehca jin gui ne da hñihtzibi ca Ocja cü cjahni-cü, ncjahmu xí bbeh quí mhyjü. Ya jin te i tzujitejü. Ca Ocja xí jiej-yü pa xcá bbe í tzöju. Ncjapu xí unijü car castigo ca rí ntzöju.

²⁸ Como ya jí xcá ne yü cjahni di mbenijü ca Ocja, ca Ocja xí jiej-yü pa da cjatsje göhtjo cü nttzomfeni cü i mbeníjü. Ncjahmu ya xí ttzon quí mfenijü. Ya jin gui padijü cja rá ntzö ca i ötjü? cja huá ja i ncja ca rá zö? ²⁹ Eso, i ötjü nduntji cosa cü jin gui tzö. I öhtibijü quí hñohui ca rá ntzö, cja i ühui. I ndo ne da jña, pa da ndo ngujqui ca i pehtzi. I huihtzihui cár minga-cjahnihui, cja

i jombi tujni. I huenihui. I pöhtite. I øti ntjöti. Rá zohmite. I jóxi cosa rá nttzo cár hñohui. I tzajte. I xohtzibi bhetjri cár hñohui.³⁰ I ñajquibi ca rá nttzo. I ühui ca Ocja. I bhetibi úr tzö cár minga-cjahnihui. I hñixtsje ga mbení mbo úr møy, cja i hñixtjo ga ña. Tzi ratotjo i øti cosa rá nttzo. Jin gui ne da dyøjti cár ta co cár me.³¹ Jin gui ne da ntiende ja i ncja ca rá zö, co ja i ncja ca jin gui tzö. Jin gui cumpli ca i ma. Jin gui mah quí minga-cjahnihui, cja jin gui perdonabi car cjahni ca te i øhtibi. úr hñattijqui.³² Cü cjahni cü i ncjaju pü, ya xqui padijü, i ndujpiteju. Guejto i padijü, xí man ca Ocja, cü to i øte ncjapü, rí ntzöhui da ma pü jabü jin gui tzö, da bbedijü pü. Pe masque ya xqui padijü-ca, i segue i øtijü ca rá nttzo, hasta i ndo mpójmu bbü i ccahtijü cü pé dda cjahni cü i øti ca rá nttzo hneje.

Dios juzga conforma a la verdad

2 Ca to da dyøde te i ma nar carta-na, dí nzofo hneje. Dí xifi: Hnehquigue hneje guí ndujpite, masque guí mangue, jin guí øti cosa ncjá yü xtú juxcua. Jin gui importa toquigue. Ndejmä guí ndujpite hneje. Bbü guí tzohmi guer hñohui ca i øti ca rá nttzo, ncjahmu guí ntzohmitsje hneje, como guí øte ncjadipü.² Ya xtí padijü, car Tzi Ta jitzi jin gui consenti cü i øti ca rá nttzo. Como guegue i øjtiguija jujticia, i castiga cü cjahni cü i ndujpite.³ Nuquigue, guí tzohmi cü to i øti cü cosa-cü, cja hne guí øte ncjapü hneje. ¿Cja guí mbengue, da ncastiga cü pé dda, pe nuquigue,

xquí huete?⁴ Cierto, rá ndo ngu cár ttijqui ca Ocja. I tzejtitjo ca dí øhtibiju. Jim be ga dyuhtibitjo úr huenda nñr cjahni nñ i ndujpite. Cja nuque, jí bbe i ddahqui cuenta te rá nguehcä i tópique ca Ocja. I tópique pa gui ntzohmi, gui jieh ca rá nttzo cja gui jioni guegue-ca.⁵ Nuquigue, jin guí gradecebi cár ttijqui ca Ocja. Ncjahmu xcú dyembi ir møy gui dyøti ca rá nttzo. Eso, más drí jñúx car castigo ca da ttahqui car pa bbü xtu eh ca Ocja pa da jñanquijü úr huenda. Car pa-ca, göhtjo yü cjahni da ccahtijü, rá zö ga dyøti jujticia ca Ocja.⁶ Como guegue da cohtzibi yü cjahni cada hnaa segün ca xtrú dyøte bbü mír hmüjcua jar jöy.⁷ Cü cjahni cü mí jon ca Ocja cja mí ne di döti car nzajqui ca jin da tjegue, ca Ocja da un car nzajqui-ca. Cü cjahni-cü, bbü mí bbüjcua jar jöy, mí ungui úr møyü di dyøtijü ca rá zö, como mí jonijü ja drí hmüpü pa di tzöpijke ca Ocja, xajmä di jogui di zötijü pü jitzi.⁸ Nu cü pe dda cjahni cü mí ntóxtihui ca Ocja cja jí mí ne di dyøj nñr palabra nñ ncjuani, ca Ocja da unijü hnare castigo drá nttzo, tiene que da bbedijü. Ncjapü drí ncastiga cü cjahni cü mí ten ca rá nttzo bbü mír hmüjcua jar mundo.⁹ Eso, cü to xí dyøti ca rá nttzo da ndo sufrijü cja da zøjü ca rá ü, da ndo dumøyü. Jin te i cja, masque di judio o di hnahnö cjahni, göhtjo da ttun cár castigoju.¹⁰ Pe göhtjo cü xí ndenijü ca rá zö, da zóm pü jabü bí bbüh ca Ocja, da ttun cár tjaja, cja da hmøy rá zö, tanto cü judio, como cü cjahni cü jin gui judio.¹¹ Como ca Ocja da dyøhtibi jujticia göhtjo cü cjahni,

masque di judio o di hnahño cjahni, cu jin gui judio.

¹²Göhtjo cu cjahni cu xí dyøti ca rá nttzo, ca Ocja da un cár castigo, da guh pü jabu da bbedi. Cu cjahni cu jí xcá mbädi ja ncja ga man car ley ca bi zoguiguiju car Moisés, cja xtrú dyøti ca rá nttzo, ndejmä da cjuh pü jabu da bbedi. Guejti cu judio cu xí mbädi te i man car ley, pe jí xcá dyøti ca i ma, guegue-cu da ttembi cár castigoju como ngu ga mam pü jar ley, da cjuh pü jabu da bbediju hneje. ¹³Car cjahni ca i paði te i man car ley ca xí ttzoquibi cu judio, pe jin gui øte, ca Ocja da xifi i ndujpite, cja da un cár castigo. Jøñä cu cjahni cu i øtiju ncja ngu ga man car ley, ca Ocja da xih-cu, jin te i tuju. ¹⁴Nu cu cjahni cu jin gui judio, jí xcá mbädiju te i man car ley ca bi zoguiguiju car Moisés. Cu ddaa-cu, xí mbentsjeju ja i ncja ca rá zö, cja xí dyøtiju-ca. Cu cosa rá zö cu xí mbentsjeju, i jñejmi cu rá zö cu i mam pü jar ley. Ncjahmu xí sirvebiju gá ley quí mfeni cu xí mbentsjeju. ¹⁵Ncjapu cu cjahni cu jí xcá mbädiju te i man car ley ca i ten yu judio, i mbentsjeju ja i ncja ca rá zö, cja co ja i ncja ca jin gui tzö. I pøni ncjahmu di pehtziju hnar ley ca i teniju hneje, masque jin jabu i jutzi. Gue quí mfenitsjeju i jampi úr huenda cu cjahni-cu, como i ntzohmitsjeju mbo úr mhyju, ¿Cja xí dyøti ca rá zö, cja huá rá nttzo ca xí dyøte? ¹⁶Nu ca Ocja i paði göhtjo, hasta cu mfeni dí mbeniju mbo um mhyju. Bbu xta jñanquiju ur huenda, xta juzga göhtjo ca xí dyøti yu cjahni cja co ca xí mbení mbo í mhyju, cja da uni cada hnáa

car castigo drí ntzöhui. Gue nar tzi ddadyo jña dí xij yu cjahni: Car Tzi Ta jitzi xí wejqui hnar pá, pa da jñampi úr huenda yu cjahni, göhtjo yu i bbucua jar jöy. Guegue car Jesucristo da cja ur nzöya, da xij yu cjahni to cu i ndujpite, cja co to cu jin gui ndujpite.

Los judíos y la ley de Moisés

¹⁷Nuquigue, guí ccähti nar carta-na, bbu gür judio, nubbu, guí ten car ley ca bi zoguiguiju car Moisés. Pe ntoja guí hñixtsje hneje, guí ina, nuquigue da ttahqui car nzajqui ca jin da tjegue. Guí mangue, úr bajtzi qui ca Ocja. ¹⁸Guí paði ter beh cq i tzøh ca Ocja, cja guí paði gui juajni ca rá zö, como gue car ley i xihqui ja i ncja-ca.

¹⁹Ncjahmu guí paði gui cjuti car godö da denqui. Guejto guí intzibi hnar tzibi cu to i dyo jar bbexuy.

²⁰Guejto hne guí mangue, guí paði gui ujti yu cjahni yu jin te i paði. Guehue guí xøjpi yu jin te bbe i nxödi. Como guí pehtzi car ley, guí ina, ya xquí paði göhtjo ca ncjuani. ²¹Guí ujti yu pé ddáa ja ncja da dyøti ca rá zö. ¿Dyocä jin guí nxöjtsje guí dyøtigue ca rá zö, bbu? Guí mangue, jin to da mpe. ¿Dyocä guí mpegue, bbu? ²²Guí mangue, jí rí ntzöhui da yohti bbejña hnar hñøjø, o da yohti dame hnar bbejña. Xique, ¿dyocä guí øte ncjapu, bbu? Guí ttzo cu cjaa cu i ttihzibi ncjahmu Ocja, pe jin gui ntjumuy. ¿Dyocä guí cüti pü mbo cu nicja pü jabu i bbuh cu cjaa cu jin te i ntjumuy, guí mpe pü? ²³Guí hñixtsje ca guír paði te i man car ley. ¿Dyocä jin guí øte ncja ngu ga

mam bbu? ¿Dyoca guí bbetibi ár tzö ca Ocja? ²⁴Nuquéju, guí judioju, guí pehtziju car ley pe jin guí teniju, eso, xí nzuj nar palabra na i jux pa jar Escritura: “Cu hnahño cjahni cu jin gui judio cja jin gui pehtziju cár ley ca Ocja, i ccajtiqui quir vidaju, cja i majmu, jin gui tzö ca Ocja ca guí teniju.”

²⁵Cierto, xí ncuajtiqui ca hnar seña ca i ttohtibi göhtjo cu hñojø cu judio, pa gui mbeni, nuque, gúr judio, xcú dyotihui acuerdo ca Ocja. Pe bbu jin guí ten car ley, guí jñejmi cu cjahni cu jin gui judio. Jin te i muhui ca xcá ncuajtiqui quer seña pa gui mbeni, ár mejtiqui ca Ocja. ²⁶Guejti car hñojø ca jin gui cuati car seña ca i ncuajtibi cu judio, bbu di dyote ncja ngu ga man car ley ca xí nzoguiguiju car Moisés, ca Ocja da ccahti car cjahni-ca ncjahmu di cuati cár seña hneje. ²⁷Car cjahni ca di dyote ncja ngu ga man car ley, masque jin te di cuati car seña-ca jár cuerpo, guegue da juzga nur judio nu i cuati car seña-ca jár cuerpo. Da xifi i ndujpite, ca jí rí den car ley ca xí ttoquibi cu judio. ²⁸Nuquigue, bbu gúr judio, xí ncuajtiqui car seña ca i ttohtibi göhtjo cu hñojø cu judio, pe nucá, i bbu xotzetjo. Jin gui cjahqui drbajtzi qui ca Ocja car seña-ca. Bbu ár bajtzi qui ca Ocja, guí eme guegue göhtjo mbo ir may. ²⁹Car cjahni ca i eme ca Ocja göhtjo mbo ár may, guegue-ca i ccahti ncjahmu di cuati car seña ca i ncuajtibi cu hñojø cu judio. Jin te i cja bbu di cuati jár cuerpo o jin di cuati. Como i eme ca Ocja göhtjo mbo ár may, i mbeni ja da ncja pa da

tzópi. Jin gui cjajpi ncaso yu pe dda cjahni te da xifi. Ca Ocja i nu rá zó car cjahni-ca.

3 Nuya bbu, éter beh cq i pehtzi cu judio ca jin gui pehtzi cu hnahño cjahni cu jin gui judio? Car Tzi Ta jitzi bi juajni cu judio pa di cjaju í cjahni guegue-ca, cja bi dyotihui acuerdo hneje. I bbuh cu to di hñoni ncjahua: ¿Te bi provechabi cu judio car acuerdo-ca? ²Xí provechabi rá ngu. Hnar cosa rá ndo zó ca xí ttun cu judio, bi tsijmu te i man cár palabra ca Ocja, cja bi ndöjti ár dyeju cu Escritura. Gue cu Escritura i xijquiju ja i ncja ca Ocja. ³Masque i pehtziju cu Escritura cja i padiju te i ma, ndejma i bbuh cu dda judio cu jí xcá ne xcá hñemeje. Mí yomfeniju, mí inaju, jin di cumpli ca Ocja cu promesa cu bi xijmu bbu mí dyotihui acuerdo cu judio. Pe jin gui cierto cár mfeniju. ⁴Ca Ocja tiene que da cumpli ncja ngu xcá ma. Masque jin di bbuh hnار cjahni ca di eme, cja da ttoti ca xí man ca Ocja?, masque göhtjo di coniju, di majmu jin te i ntumuy quí promesa, pe nu ca Ocja ndejma di cumpli ca xí ma. Bbu di jogui di ttozjni ca Ocja pa di ttohtibi ár prueba, di zudi ncja ngu ga mam pa jar salmo. I ma ncjahua:

Nuquigue, um Tzi Jmuquije, bbu da tjanqui ár huenda, xta fadi, guí mangue ca ncjuani, Cja bbu xta ttohtibi ár prueba cu palabra cu xcú ma, xta nigui, göhtjo cierto cja göhtjo rá zó.

⁵Bbu di ntoxtihui ca Ocja hnar cjahni, cja di ttozjni yojmi pa di ccajquibi ca ncjuani, tiene que

di tate ca Ocja cja di ncastiga car cjahni. Nubbú, pé ntoja di dyön car cjahni: “*¿Dyoca da ttajqui cam castigo? Dí mangö xtú øhtibi hnar favor ca Ocja ca xtá ntøxtibbe.* Guehcá xtá øhtibi ur fuerza, xí nigui, cierto ca i ma guegue. Bbu da castiggui ca Ocja, jin gur jogui nzöya guegue.” Ncjapu di däh car cjahni-ca. ⁶Pe ndejma ur jogui nzöya ca Ocja. Bbu jina, jin di mehtzi derecho da juzga göhtjo yu cjahni yu i bbucua jar jöy.

⁷Xi bbu pé di ndo zeh car cjahni-ca, pé di dajtjo: “Guehcá xtá jöxcö ca Ocja jin gui cumpli ca i ma, xí ttøhtibi ur prueba cja guegue xí ndagui. Ncjapu, más xcá fadi, göhtjo cierto ca i ma. Tzudi, xtú föxcö ca Ocja pa más da ndo ttømebi. *¿Dyoca i tsjijqui dí ndujpite bbú?*” ⁸Ncjahmu i ne da xijquijü car cjahni-ca, masque gu øtijü ca rá nttzo, jin te da cja. Göhtjo bí jojtjo, como göhtjo da sirve pa más da ttøme ca Ocja. Pe jin gui tzö car mfeni-ca. I bbu cü dda cjahni cü i jøxquigö, dí mangö hneje, i jogui gu øtijü ca jin gui tzö pa más da ttøme ca Ocja. Cü cjahni-cü, metjritjo. Rí ntzöhui da bbeh-cü.

Todos somos culpables

⁹Cierto, xí ndöjtiguiü um dyejü, dí judioju, yu Escritura yu i xijquijü ja i ncja ca Ocja. *¿Xi ya bbu? ¿Cja más rá zöguijü, dí judioju, ni digue yu pé dda cjahni? Jina.* Ya xtí padiju, dí göhtjo dí cjahnijü, dí ndujpiteju. Göhtjo dí øtijü ca rá nttzo, tanto yu judio, cja co hneh cü jin gui judio. ¹⁰Dí ncjajü ncja ngu ga mäm pü jár palabra ca Ocja.

ujtjo, jin te i bbu hnar cjahni ca jin di ndujpite, ni di hnaa.

¹¹Jin to i bbu ca di pehtzi mfeni rá zö, göhtjo xí cjaü dondo, jin to i jon ca Ocja.

¹²Göhtjo xí jiejmu cár hñu ca Ocja, ya xná ndo nttzo cár hmuyju. Jin gui bbu ca to di øti ca rá zö göhtjo ur tiempo, nim pa hnaa.

¹³Rá ndo nttzo cü palabra cü i majmu, como nxogue rá nttzo cü i mbeni mbo í mhyju.

Cjaatjo i ñajquijü bbtjri. Bbu i ñajü, i ne da möhtijü cü to i ñahui, ncjahmu pozu.

¹⁴I ndo tzajteju, i ndo uhui quir minga-cjahnijü.

¹⁵I ndo cja ur ddiji quir huajü pa da zuh cár hñohui cja da möhtijü.

¹⁶Göhtjo pu jabü i pa, i juaqui o i yøhti cü te i töti. I øhtibi tujni cü to i ntjehui, cja i cjajpi da ndo sufri.

¹⁷Jin gui padiju ja ncja drí hmupju rá zö.

¹⁸Jin gui mbenijü ca Ocja, cja jin gui tzujü guegue.

¹⁹Dí padiju, guejcöju dí judioju, i nzoquijü ya palabra-ya, como guejcöju bi ttzoguiguijü cü Escritura. Tzudi, göhtjo yu cosa rá nttzo yu i juxcua, dí øtigöju-yu hneje. Jin gui jøñä cü hnahnö cjahni cü jin gui judio i øtijü ncjapu. Eso, bbu xta jñanquijü ur huenda ca Ocja, jin to da ma: “Jin te dí ndujpitegö.” Göhtjo nur mundo parejo da ttøhtibi ur huenda cja da tsjifi, i ndujpite. ²⁰Jin tema cjahni da tsjifi jin te i tu, masque xtrú ungui ur may xtrú nden car ley,

como jin to i jöti da dyøte göhtjo ca i mañ car ley. Car ley i xijquijü jabü dí ndujpитеja. Nu ca Ocja jin da ccajtiguijü rá zö por rá nguehcä dár øtijü tengü partetjo digue ca i mäm pü jar ley.

La salvación es por medio de la fe

21 Cü cjeya cü cja xí tjogui, cja nguehca xtú ødeju ja ncja gär cuatijü ca Ocja pa jin da xijquijü dí ndujpитеja. Pe ya má yabbü, ca Ocja bi xih car Moisés cja co cü pé dda profeta ja di ncja drí guati guegue cü cjahni pa di nccähti rá zö, masque jí xtrú cumplijü car ley. Cja cü profeta bi jñux pü ja Escritura car hñü ca bi mañ ca Ocja. **22** Nuya, ya xtí padijü, göhtjo yü to da guatijü car Jesucristo pa da ccähtzibijü ca i tujü, da jogui drí guatijü car Tzi Ta jitzi. Guegue-ca da nuguijü parejo, dí göhtjojü, yü judio cja co guejti yü cjahni yü jin gui judio. **23** Porque dí göhtjojü, xtú øtijü ca rá nttzo, nim pa hnaaguigöjü xscrü jöti gua øtijü ca rá zö göhtjo urre tiempo, pa di jogui gua cuatijü car Tzi Ta jitzi. Como guegue rá nttzujpi cja jin te i tu. **24** Nu car Tzi Ta jitzi co ni cár pöjtö, i xijquijü, ya xqui ccajtiguijü ncjahmu jin te dí tujü, como guegue car Jesucristo xí nguti ca rá nttzo ca xtú øtiju. **25** Car Tzi Ta jitzi bú pejni guegue hua jar jöy pa gá mfön cár cji por rá nguejcöjü. Bi ncjapü gá nguti car Jesús ca rá nttzo ca xí dyøti yü cjahni. Yü cjahni yü xí nguati jür dye car Jesucristo, gue yü xí nguhtzibijü ca rá nttzo ca xí dyötijü. Cü cjeya cü xí tjogui, bbü jí bbe mbá eh car

Jesucristo, mí mben cü dda cjahni, jí mí nttzujpi car Tzi Ta jitzi, como jí mí øti jujticia. Bbü-bbü mí castiga cü cjahni cü mí øtijü ca rá nttzo. Bbü-bbü mí jejtjo. Nu car Tzi Ta jitzi mí pentitjo quí mfeni, porque ya xi mí mbeni du pejni cár Tzi Ttu pa di guti ntero ca rá nttzo ca xí dyøti yü cjahni. Cja nuya, ca xcá ndü car Jesucristo, ya xí nigui, cierto i øti jujticia car Tzi Ta jitzi, cja rá nttzujpi hnëje. **26** Cja nuya, ya xtí padijü ja xí ncja xcá jogui pa da perdonaguijü co cár pöjtö ca rá nttzo ca xtú øtijü. Guehca xtá cuatijü jár dye cam Tzi Jmujü Jesús, cja guegue-ca xí nguti ca rá nttzo ca xtú øtigöjü. Nuya, ya jin da dyütiguijü urre huenda car Tzi Ta jitzi.

27 Jin to da hñixtsje. Ca to di ma, guegue rá zö ga nden car ley, cja jin te i tu, i nquivoca. Ndejma i ndujpite, como jin to i jöti da dyøte göhtjo ca i mañ car ley. Dí göhtjojü dí ndujpитеja, nu car Tzi Ta jitzi i ccahti rá zö yü cjahni yü xí hnëme guegue pa da gähtzibijü ca i tujü. **28** Car Tzi Ta jitzi da ccahti rá zö ca to xí nguati jár dye car Jesucristo. Jin te i cja bbü xtrú nden car ley o jina.

29 Ntoja i bbüh cü to di ma: “Ca Ocja jin da cuajti cü hnahnö cjahni cü jin gui judio. Jøñaguigöjü dí judiojü da cuajtiguijü.” Dí xihquijü, guejti cü cjahni cü jin gui judio ca Ocja da cuajti, por rá ngue cár Tzi Ttu. **30** Como hnaadi ca Ocja i bbü, parejo da cuajti göhtjo cü to xí nguati jár dye car Jesucristo. Cü cjahni judio cü xí dyötihui hnär acuerdo ca Ocja, bbü xta guatijü

car Jesúis, ca Ocja da xijmu jin te i tuju. Guejti cu cjahnitjo cu jin gui judio, cu jí xcá dyøtihui ca Ocja tema acuerdo, bbu xta guatiju car Jesúis, ca Ocja da xijmu jin te i tuju hneje.³¹ ¿Cja i pøni ncjahmu jin te i sirve car ley, bbu? Jina. Jin gui pøni ncjapu. Guehca xtá cuatiju jár dye car Jesucristo, nuya dí ntiendegöhu, göhtjo cierto ca i xijquiju car ley.

El ejemplo de Abraham

4 Nuya, dí mbembiqiju digue ca ndor Abraham. Yu cjahni judio xpá hñeje digue cár cji guegue. Ca Ocja bi ccahti car Abraham ncjahmu jin te di tu. ¿Te rá nguehca?² Bbu di nu rá zö ca Ocja por rá nguehca xtrú dyøti ca rá zö göhtjo úr vida, di jogui di hñixtsje car Abraham. Nu guegue jin gá nzøhtze di dyøte ntero ca rá zö, pa di nu rá zö ca Ocja.³ Gui mbeniju te i mampu jar Escritura: “Car Abraham bi hñeme, göhtjo mbo úr muy, ca Ocja di dyøte como ngu gá maq. Por eso, ca Ocja bi nu car Abraham ncjahmu jin te di tu.”⁴ Bbu i peh hnar mefi, cár tjaja ca i nccuhti jin gui ttuntjo por gusto, pe i nesta da ttuni, como guehca xí ndaja.⁵ Nugöju, jin gui nesta gu mpeguiju ncja hnar mefi, ncjahmu di jogui gri tåtsjeju car nzajqui ca jin da tjegue. I nesta gu emebiju cár pøjö ca Ocja, pa da nuguiögju ncjahmu jin te gri tuju hneje. Cu cjahni cu i ndujpite pe i öjpju ca Ocja da perdonabitjo co cár tzi pøjö, guegue-ca i recibi ncjahmu jin te xtrú dyøtiju ca rá ntto. ⁶Guejti ca ndor David, i mantjo ncjapu hneje,

ína: “Da ndo mpöh car cjahni ca da nu ca Ocja ncjahmu jin te di tu, masque ndejma xí dyøti ca rá ntto.”⁷ I bbu ca hnar salmo ca bi dyøti car David, pu jabu i ñu ncjahua, i ína:

Da ndo mpöh car cjahni ca xí ccuhtzibi ca rá ntto ca xí dyøte, xí mperdonabi ca mí tu.

⁸ Da ndo mpøjö, como ya xquí padi, ya jin da dyuhtibi ur huenda ca Ocja.

⁹ ¿To cu cjahni cu da jnu ncjahmu jin te di tu? Göhtjo cu cjahni cu i tóhmi ca Ocja da perdonabitjo co cár pøjö, cu judio, cja hnh cu cjahni cu jin gui judio. Dí padiju, ca Ocja bi nu rá zö car Abraham, bi xifi jin te mí tu, como guegue-ca bi hñeme göhtjo mbo úr muy, ca Ocja di cumpli ca xquí maq.¹⁰ ¿Ncjahmu bi tsjih car Abraham, ya jin te mí tu? ¿Cja bi tsjifi ncjapu bbu ya xquí ttøhtibi jár cuerpo car seña ca i ttøhtibi cu judio? Jina. Gue bbu jí bbe mí ttøhtibi car seña bi tsjifi jin te mí tu.¹¹⁻¹² Bbu jí bbe mí ttøhtibi car Abraham car seña-ca, guegue bi hñemebi car palabra ca xquí man ca Ocja, cja por rá nguehca, ca Ocja bi xifi, jin di ttøhtibi ur huenda digue ca xquí dyøte. Cja bbu ya xquí xifi ncjapu, nubbu, bi ttøhtibi jár cuerpo car Abraham car seña ca i ttøhtibi cu judio. Car seña-ca mí sirve pa di mbembi car Abraham, ca Ocja xquí guhtzibi ca rá ntto ca mí tu, cja xquí cuajti gá bajtzi. Como guegue car Abraham mûr primero car cjahni ca bi hñeme, ncjahmu bi cja úr taju göhtjo cu cjahni cu i eme ca Ocja pa da guhtzibi ca i tuju co cár tzi pøjötjo.

Göhtjo cu cjahni-cu, i nū ca Ocja ncjahmū jin te di tuju, tanto cu judio cu xí ttøhtibi ca hnar seña jáy cuerpojū, tanto cu hnahnō cjahni cu jin gui ttøhtibi car seña-ca.

La promesa es cumplida por medio de la fe

¹³Ca Ocja bi xih car Abraham di mandado hua jar jöy, cja co hnēh quí bajtzi cu di hmuy di mandadojū hneje. Cár tiempo car Abraham, jí bbe mí bbuh car ley ca i ten cu judio, pa di dyøti guegue ca i ma. Guehca xquí hñeme göhtjo mbo úr muy, ca Ocja i cumpli ncja ngu ga ma, guegue-ca bi nū rá zö cja bi xifi di mandado hua jar jöy. ¹⁴Guejquitjogójū, bbu di nestá gri tengójū car ley ca bi man car Moisés pa di ttajqujū car nzajqui ca i ntjumuy, nubbú, di poni, guejcöjū gri joniju ja grí tajcöjue-cá. Nubbú, jin di jogui gua tóhmijú ca Ocja, pa da perdonaguitjojū co cár tzi pöjö. Ncjahmū ya xtrú pöti ca Ocja cár palabra ca bi xih car Abraham, ya jin di jogui gua emebijú. ¹⁵Cu cjahni cu xí tsjih car ley ca bi man car Moisés, tiene que da dyøjte, cja bbu jinā, da ttun cár castigoju. Nu cu cjahni cu jí xcá dyødejú car ley ca bi man car Moisés, jin gui tzö da deniju-ca, como jí xcá mbadijú ja i ncja. Guejtjo hneje, jin gui tzö da ncastiga como ngu ga man car ley.

¹⁶Ca Ocja bi xih car Abraham guegue di dyøhtibi cu dda favor rá tzi zö, jöntsetjo porque bi hñeme car Abraham car palabra ca xquí man ca Ocja. Guejti quí bajtzi car Abraham cu jí bbe mí bbuy, ca Ocja di cjajpi mismo cu

favor-cá. Göhtjo yu to i eme, ca Ocja da perdonabitjo co cár tzi pöjö, guegue-yú xí ttzoquibi mismo car promesa ca bi tsjih car Abraham, como i nū-yu ca Ocja ncjahmū í bajtzi car Abraham hneje. Yu cjahni yu rí hñejé digue cár cji car Abraham i inaju, bi ttuni guegue-yu car promesa, por rá nguehcá rí den car ley. Pe jin gui jöñä cu to i ten car ley xí ttun car promesa. Guejtjo xí ttuni göhtjo yu pé ddaa yu i emebijú cár tzi pöjö ca Ocja, ncja ngu nguá hñeme car Abraham. Göhtjo-yu da ttun car favor ca bi ttun car Abraham. I poni ncjahmū dum tajú car Abraham, cja í bajtziguijú, dí göhtjojú como ngu xtá emejú ca Ocja ncja ngu nguá hñeme car Abraham, bbu dí judioju o bbu jin dí judioju. ¹⁷Ya xí nzah car palabra ca bi man ca Ocja bbu mí xih car Abraham: “Nuque, por rá nguehcá xquí hñemegui, gui cja úr tajú rá ngu cjahni cu da hmuh pu pé dda jñini, göhtjo tema jöy.” Bi tsjifi ncjapu como mí eme ca Ocja, göhtjo mbo úr muy. Guegue mí paði, rí hnēh ca Ocja cam vidajú, hasta guejti cu cjahni cu ya xí ndu, ca Ocja i ungui nzajqui guegue-cu hneje. Guejtjo i mandado da ncja cu cosa cu jí bbe i bbuy, cja tiene que da hmuh-cu, como ngu ga ma.

¹⁸Masque ya xi mí man car Abraham, ya má yabbu xquí tjoh car tiempo pa di hmuh hnár bajtzi, ndejmá bi hñeme di hmuy, cja guegue di cja úr ta rá ndo ngutsje yu cjahni, como guehcá xquí xih ca Ocja. Bi xifi: “Drá ndo ngutsje quir bajtzi cu da hmuy, ncja yu tzø.” ¹⁹Ya xquí mben car Abraham,

ya jin di jogui di hmuh hnár bajtzi, como ya xquí ndo ntita, casi ya xi mí pehtzi cien año, cja ya xti tje*h* car nzajqui. Guejti car Sara ca mur bbejña guegue, ya xquí ndo nchujchu, cja göhtjo úr vida jí mí ónte. ²⁰Pe jin gá yomfeni car Abraham bbu mí xih ca Ocja di hmuh hnár bajtzi. Bi mpöjö, cja bi hñeme göhtjo mbo úr may, tiene que di ncja-ca. ²¹Como mí pa guegue, ca Ocja jin di zö rá ntji di cumpli ncja ngu xquí xifi, bi hñeme car Abraham, cierto di hmuh hnár ttu. ²²Bi ncjapu gá tzópi ca Ocja, cja guegue-ca bi xih car Abraham, jin di dyuhtibi úr huenda digue ca rá nttzo ca xquí dyote, di jnutjo ncjahmu jin te di tu.

²³⁻²⁴Nur palabra nu bi tsjih car Abraham, jin di ttuhtibi úr huenda digue ca rá nttzo ca mí tu, bi tjx pu jar Escritura pa hnequigöju, gu padiju, ca Ocja da nuguiju rá zö hneje, bbu gu emebiju cár promesa ncja ngu gá hñeme car Abraham. Dí padiju rá nzeh cár promesa ca Ocja, jin da ttujtiguiju úr huenda digue ca xtú ótiju. Car Tzi Ta jitzi bi xox cam Tzi Jmuju Jesús, eso dár padiju, ya jin te dí tuju ya. ²⁵Bbu mí du cam Tzi Jmuju, bi guti ca rá nttzo ca xtá ótiju. Cja car Tzi Ta jitzi pé bi cjajpi bi jna úr jna pa dár padiju, cierto xí ccuzquiju göhtjo ca ndí tuju.

El resultado de ser declarados justos

5 Nugoju, como ya xtí padiju, xí perdonaguiju ca Ocja co cár tzi pöjö, guejto dí padiju, ya xqui núguiju rá zö hneje. Guehca xcá hmöh madé cam Tzi Jmuju Jesucristo, ya xí ngo úr may car

Tzi Ta jitzi, cja nuya, dí mpöjcöju ya-cá. ²Cam Tzi Jmuju Jesucristo xí möxquiju. Bbu jina, jin di nuguiju rá zö car Tzi Ta jitzi, cja jin di jogui gua cuatiju. Pe nuya i ccajtiguiju rá zö, cja dí mpöjmu ya-cá. Guejto dí mpöjmu, como ya xtí tóhmiju car pa gu ma grí hmupju cam Tzi Taju pu jitzi, gu ccahiju te tza rá zö guegue. ³Guejto dí mpöjmu mента dí bbupju hua jar jöy, hasta dí mpöjmu bbu dí sufriju hneje. Como dí padiju, ca dár tzóju prueba, más grá cuatiju ca Ocja cja más grá zediju ca dár emeju guegue. ⁴Cja bbu dí tzejtiju ch prueba, nubbu, dí nxödiju ja ncja gár hmupju pa gu tzópiju ca Ocja. Diguebbu ya, ca más gár hmupju ncja ngu ga ne ca Ocja, más gár pehtzibiju confianza da ttajquiju ca dí tóhmiju. ⁵Dí padiju, jin da jiöjquiju car Tzi Ta jitzi. Ntjumay da ddajquiju ca dí tóhmiju. Guegue xpá mejnquiju cár tzi Espíritu grá yojmu, cja nuca i fökquiju. I xijquiju, i ndo neguiju ca Ocja, cja da cumpli göhtjo ca xí xijquiju.

⁶Mahmeto nim pa ndí meyaju ca Ocja, nim pa ndí padiju ja ncja drí perdonaguiju ca ndí tuju. Pe bbu mí zöh car tiempo ca xquí man car Tzi Ta jitzi, bi du car Jesucristo pa gá möx yu cjahni yu i ndujpite. ⁷Jin gui bbuh hnár cjahni ca dí mah cár minga-cjahnihui hasta di jñegui di bböhti por rá nguehcá. Masque drá zö cár vida cár hñohui, pe jin di dö cár vida por rá ngue guegue. Tal vez di nigui hnár cjahni ca di jñegui di bböhti por rá ngue cár hñohui, bbu di hñina, i ndo myhui ca hnáa. ⁸Nugoju, bbu jí bbe ndí

meyaju ca Ocja, nim pa ndí jogui cjahniu. Ndí ndujpитеju. Nu car Tzi Ta jitzi bi neguiu rá ngu, hasta bi dö cár Tzi Ttu pa gá ndu por rá nguejcöju. ⁹Nuya, ca xtá cuatiju jár dye car Jesucristo, car Tzi Ta jitzi i nuguiu ncjahmu jin te gri tuju, como bbu mí du car Cristo, bi ttuni guegue car castigo ca dí mereceju. Bbu xta ncja car juicio, ya jin da zújquiju car castigo ca rí ntzöhui da ttajquiju, como nuya dí yojmu car Jesucristo. ¹⁰Máhmeto ndí uju car Tzi Ta jitzi, ni mpa ndí ne gua hmupju guegue. Pe ca xcá ndu cár Tzi Ttu, xí ngo um lugarju, nuya xí ngo úr muy car Tzi Ta jitzi, cja dí padiju hneje, gu nuju car nzajqui ca jin da tjegue, como ya xtí yojmu cár Ttu ca Ocja. ¹¹Guejto dí mpöjmu ca dár hmupju car Tzi Ta jitzi yu pa-ya. Como xí hmöh madé cam Tzi Jmuju Jesucristo, nuya i nuguiu rá zö cam Tzi Taju, cja dí mpöjcöju-ca.

Adán y Cristo

¹²Má ndo yabbu ca primero ur hñojo bi dyoti ca rá nttzo. Guegue mûr Adán. Como guá hñe guegue göhtjo yu cjahni hua jar jöy, göhtjo bi deniju cár hmuy car Adán. Guegue-cu bi dyoti ca rá nttzo hneje. Guehca gá dyoti ca rá nttzo car Adán, bi tjajquibi ca mîr yojmi ca Ocja, cja guejtjo bi tjem cár nzajqui, bi du. Pé bi ncjadipu göhtjo cu pé dda cjahni cu xí hmucua jar jöy, como göhtjo xí dyotiju ca rá nttzo. ¹³Bbu jí bbe mbá eh car Moisés pa di xih cu cjahni car ley, cu cjahni mí ötiju ca rá nttzo. Pe jí mí tjampi ur huenda ncja ngu ga mâm pu jar

ley, como mí ujtjo to di nzofo o di xijmu ja i ncja car ley. ¹⁴Pe ndejma bi du göhtjo cu cjahni-cu hneje, bi ttuniju car castigo ca xquí ttembi car Adán. Göhtjo mí tuju, como göhtjo mí ötiju ca rá nttzo. Mí bbuh cu dda cjahni cu mí öti tchutjo ca már nttzo. Már nttzo ca mí öti cu cjahni-cu, pe como jí mí padiju ja i ncja cu i ccax ca Ocja, jí mí ntóxtihui ca Ocja. Nu car Adán, más már ndo nttzo ca bi dyote, como bi dyoti ca xquí ccax ca Ocja. Guegue car Adán bi fujti cam razaju, eso, dí göhtjoju dí ötiju ca rá nttzo hneje, Nu car Jesucristo bi fujti hnar ddadyo raza yu cjahni. Ncjahmu í bajtziguiju guegue, göhtjo yu to i emu, como guegue xí ddajquiju hnar ddadyo hmuy.

¹⁵Hna parte i jñejmi car Adán car Jesucristo, cja hna parte i mbödihui. Ciento már ndo nttzo ca bi dyoti car Adán, bi ttzon nûm hmuyju, dí göhtjoju, por eso, i tu göhtjo yu cjahni yu i bbujcua jar jöy. Pe rá ndo nzeh ca Ocja, cja i ndo juiguiguiju, eso guegue xí möxquiju, xí nguzquigöju car castigo ca bi zoguiguiju car Adán, cja, xí pötiguiju ca bbeto um hmuyju. Car Jesucristo co ni cár tzi pöjö xí möxquiju ncjapu. ¹⁶Nu car Adán, por rá nguehca gá ntóxtihui ca Ocja, bi tsjifi di du. Ca hnaatjo ur cosa rá nttzo bi dyoti guegue, xí ntungui, xí nzudi göhtjo yu cjahni, hasta dí göhtjoju, tiene que gu tuju. Pe ndejma rá nzeh ca Ocja, cja guegue xí ndaguiju co cár tzi ttijqui. Masque rá ngu vez xtú ötiju ca rá nttzo, ca Ocja co cár tzi pöjötjo i cjuzquigöju göhtjo ca rá nttzo ca

xtú ótiju, cja i n^ug^uij^u ncjahmu jin te dí tuj^u. ¹⁷Car Adán, bi nt^oxtihui ca Ocja ca hnar vez, cja por rá nguehc^a, xí ttajquij^u car castigo ca dár tuj^u, dí göhtjoj^u. Pe rá ndo ngu cár tzi ttijqui ca Ocja, cja guegue co cár pöjö i n^ug^uij^u ncjahmu jin te dí tuj^u, göhtjo y^u to xí nguati jár dye car Jesucristo. Masque gu tuj^u, guegue da ddajquij^u hnar ddadyo nzajqui pa grí hm^upj^u ca Ocja göhtjo ur tiempo.

¹⁸⁻¹⁹Car Adán bi m^udi bi dyotí ca már nttzo, cja cár hm^uy guegue xí tzejpiguij^u núm hm^uyj^u, eso dí göhtjoj^u dí ótiju ca rá nttzo hneje. Rí ntzöhui gu bbedij^u. Nu car Jesucristo bi dyotí cár Tzi Ta jitzi, göhtjo úr vida, cja bb^u mí d^u, bi guti ca rá nttzo ca xtá ótiju. Eso, ya xqui n^ug^uij^u ca Ocja ncjahmu jin te gri tuj^u, cja ya xí ng^uzquij^u car castigo ca di ttajquij^u. Nuya, da ddajquij^u car nzajqui ca jin da tjegue.

Bi ttajquibi car Adán ca mír yojmi ca Ocja, como jin gá ne gá dyotí, cja bi ttzon cár hm^uy. Nugöj^u, bb^u dí cuatiju jár dye car Jesucristo, guegue-c^a pé i pötigui cam hm^uyj^u pa pé da jogui gu cuatiju ca Ocja cja gu yojm^u-ca.

²⁰Bb^u jí bbe mí ttun c^u cjahni car ley, mí ótiju ca már nttzo, pe jí tza mí cjaj^u ndumuy. Eso, bi tsjijm^u car ley, pa di tjampi ur huenda digue ca mí ótiju. Nubb^u, bi bádij^u, cierto már nttzo ca mí ótiju. Bi ncjap^u gá ngujqui ca mír ndujp^ute c^u cjahni. Nu ca Ocja, i ndo juiguiguij^u. Guegue ndejma bi jion car manera pa bi möxquigöj^u. ²¹Bi g^uxquigöj^u jár dye ca Jin Gui Jo, pa ya jin da

mandadoguij^u c^um nttzomf^{en}ij^u, cja pa ya jin gu möh p^u jab^u rá hmexuy. Nuya por rá nguehc^a xtá cuatiju p^u jár dye car Jesucristo, guegue-c^a xí ng^uzquij^u ca rá nttzo ca ndí tuj^u, cja xí ddajquij^u hnar ddadyo hm^uy pa gu hm^upj^u ca Ocja göhtjo ur tiempo. Nuya i mandadoguij^u guegue co ni cár tzi ttijqui.

Muertos en cuanto al pecado pero vivos en Cristo

6 Nuya, cja ncja gu hm^upj^u ya bb^u? ¿Cja gu segue gu ótiju ca rá nttzo porque ya xtí padij^u, jin da ttajtiguij^u ur huenda? Como ya xtí padij^u, ca Ocja i perdonaguij^u co ni cár tzi pöjö. ²Jin^a, jin da joh-c^a, como ya xtú jeguij^u ca ndí ótiju ca rá nttzo. Ncjahmu dí tuj^u, yojmi car Jesucristo, bb^u ndú cuatiju p^u jár dye. ¿Dyoc^a gu seguej^u gu ótiju ca rá nttzo bb^u? ³¿Cja huá jin guí padij^u ter beh c^a i sirve car tsjixtje? Bb^u ndú xixtjej^u pa dá tenij^u car Jesucristo, ncjahmu dí yojmu guegue bb^u mí d^u. ⁴Car hora dí xixtjej^u, bi nttzedi p^u ca bbeto ur hm^uy ndár hm^upj^u. Ncjahmu dí yojmu car Jesucristo bb^u mí d^u cja bb^u mí nttögui. Cja bb^u ndú cjuadi ndú xixtjej^u, pé dí yojmu car Jesucristo bb^u mí jñ^a úr jñ^a. Nuya, dí pehtzij^u hnar ddadyo nzajqui, i jñejmi car ddadyo nzajqui ca mí pehtzi car Cristo bb^u ya xqui nantzi. Bb^u mí nantzi guegue, bi nigui te tza rá nzeh car Tzi Ta jitzi. Ncjap^u hneje da fadi te tza rá nzeh ca Ocja por rá ngue cam vidaju.

⁵Nugöj^u, dí majim^u, dí yojmu car Jesucristo bb^u mí d^u, cja guejtjo

bbu mí jña úr jña. Gu mbeníjü, ya xi mí hnahño cár vida bbu mí nantzi, cja gu ncjagöju pü hneje. Da hnahño car hmuy ca gár hmüpju ya. Nuya gu däbenijü ca bbeto um hmuygöju. ⁶Gu mbeníjü ter beh ca bi ncjaguijü bbu mí ddöti car Jesucristo pü jar ponti. Ca bbeto um hmuyjü ca ndí pehtzijü, ncjahmü guejti-ca bi tjajquibi cár ttzedi hneje, pa ya jin da mandadoguijü cüñ nttzomfenijü, cja ya jin gu segue gu ötijü ca rá nttzo. ⁷Ya xtí padijü, bbu i tu hnar cjahni, ya jin gui tzö da dyöti ca rá nttzo. Dí ncjagöju pü hneje. Bbu dí mbeníjü, xpá ddöti pü jar ponti ca bbeto um hmuyjü, ya jin gui tzö gu segue gu ötijü ca rá nttzo. ⁸Como dí mbeníjü, bi tjajquibi cár ttzedi ca bbeto um hmuyjü bbu mí du car Jesucristo, guejto rí ntzöhui gu mbeníjü, ya xtí pehtzijü hnar ddadyo hmuy ncja ngü cár hmuy car Cristo bbu ya xquí nantzi. ⁹Guejto, dí padijü, car Jesucristo bi du hna veztjo. Digue bbu ya bi nantzi, cja nuya, jim pé da du, como ya xí wengua jabu i tu yü cjahni. ¹⁰Guegue bú eje, bi cja úr cjahni ncjaguigöju. Mí nesta di du pa di guti ca rá nttzo ca i öti yü cjahni. Eso, bi jñegui bi bböhti, cja pé bi jña úr jña. Cja nuya, jin da yojpi da du, como ya xí nguti rá zö göhtjo ca ndí tujü. Nuya i bbubi cár Tzi Ta jitzi göhtjo úr tiempo. Ya jin da nu tema cosa drá nttzo. ¹¹Hnëhquitjoguejü, i nesta gui mbeníjü ncjahmü ya xcú tujü, eso, ya jin da jogui gui dyötijü yü cosa rá nttzo. Nuya, gui hmüpju hnar ddadyo hmuy pa gui tzöpijü ca Ocja, como ya xquí yojmü car Jesucristo.

¹²Nuya dí yojmü car Jesucristo, pe ndejmä dí bbüjtijü hua jar jöy, dí bbüjtijü nüm cuerpoju nü da du. Cja bbu ba eh cu nttzomfeni, dyo guí cjadi møyju. Jin gui jñeguijü pa da dähquijü-cü. ¹³Ya jin gui unijü lugar ca Jin Gui Jo da mandadoquijü pa gui dyötijü ca rá nttzo, masque guehcä ndí ötijü-cá máhmeto. Nuya, gui döjtijü ca Ocja quir møyju cja co hnëh quir cuerpoju, pa gui dyötijü ca rá zö. Gui mbeníjü ncjahmü ya xcú tujü cja pé xcú nantzijü pa gui hmüpju ddadyo. ¹⁴Mahmeto, bbu nguí mbeníjü di jogui güi tajtsjejü car salvación, segue mí tahquijü quir nttzomfenijü, cja jí mí jogui güi jiejmü ca rá nttzo. Pe nuya, ya xquí padijü, por rá ngue cár tzi pöjötjo xí perdonajogüeju ca Ocja. Tzüdi, ya xcú cuatijü hnar ddadyo jmü ca i nuquijü cor ttijqui, cja nuya, guegue i mandadoquijü.

Un ejemplo tomado de la esclavitud

¹⁵¿Xi ya bbu, cja gu ötijü ca rá nttzo porque ya xtí padijü, i perdonaguitjojü ca Ocja co ni cár pöjö, cja ya jin gui mandadoguijü car ley? Jña, ya jin gu ötijü ca rá nttzo. ¹⁶Gu mbeníjü, ya xqui bbuh hnam ddadyo Jmuju. Nuquiguejü, ya xquí padijü ja i ncja cu cjahni cu i bbuh quí jmuju. I pejpi-cü, cja rí gax ya, car jmü i ún cár tjaja. Guehquitjogüeju, gui mbeníjü, ctocä guí ne gui cjajpi ir jmuju? Bbu gui jñeguijü da mandadoquijü quir nttzomfenijü, drí gax ya da cjuhquijü pü jabu jin gui tzö. Pe bbu gui jñeguijü da mandadoquijü ca Ocja, drí gax ya, da ttahquijü

hnar ddadyo hmuy, göhtjo rá zö.
17 Nuquejü, máhmeto nguí jñeguijü mí mandadoquijü quir nttzomfenijü. Pe nuya, ca xquí hñemejü göhtjo mbo ir møyjü car ddadyo palabra ca xí tsjihquijü, hnahnó quir mfenijü ya. Rí ntzöhui gui ndo dyöppijü mpöjcje cam Tzi Tajü por rá ngue ca xí cjahquijü. **18** Nuya, ya jin gui equijü ca Jin Gui Jo pa gui dyötijü cosa cü jin gui tzö. Nuya, gue ca Ocja i mandadoquijü pa gui dyøhtibijü cár tzi voluntad. **19** Pe ntoja rá ntji ya cosa ya dár xihquijü ya. Eso, dí jequigö hnar cjahni ca i pejpi cár jmü cja i nccuhti cár tjaja, pa da jogui gui ntiendejü, cja gui padijü tema jmü guí ne gui tenijü. Bbü jí bbe nguí emejü nar tzi ddadyo jña, nguí ótiju ca rá nttzo. Car tiempo-ca, menta mím tloh cü pa, mím ngujqui ca nguír dyötijü ca már nttzo. Pe nuya, ca ya xquí ndötsjejü jár dye ca Ocja, nuya gui nxödijü gui dyötijü ca rá zö. Cja nuya, ca rí tloh car tiempo, da ngujqui ca guír dyötijü ca rá zö.

20 Bbü nguí bbüjtijü jár dye ca Jin Gui Jo, jí nguí mbenijü ter beh ca güi dyötijü pa güi tzöpójü ca Ocja. Nubbü, nguí ungui ir møyjü güi dyötijü ca rá nttzo. **21** ¿Ter beh ca mí sirvequijü ca nguí ótiju cosa rá nttzo? uitjo. Cja nuya, bbü güi mbenijü ja ncja nguír hmüpójü máhmeto, hasta guí pehtzi ir tzöjü. Bbü jin güi jiejmü car ttzovida-ca, güi bbedijü hneje. **22** Pe nuya, ca ya xquí pönijü jár dye ca Jin Gui Jo cja ya xquí cuatijü jár dye ca Ocja, gue ca Ocja guí pejpíjü ya. Guegue i fôxquijü pa gui hmüpójü hnar vida rá zö, cja xtrí gax ya, xquí pehtzijü

car nzajqui ca jin da tjegue, ncja hner tjajajü drá tzi zö. **23** Ca to i øti ca rá nttzo, i sirvebi ca Jin Gui Jo. Nu ca da ttuni jár gatzi, da ma pü jabü rá hmexuy, da bbeh pü. Nu ca to xí nguati jár dye car Jesucristo, da ttun car nzajqui ca jin da tjegue, como car Tzi Ta jitzi ya xqui nü car cjahni-ca ncjahmü jin te di tu.

Un ejemplo tomado del matrimonio

7 Um cjuädaquijü, pé ntoja guí padijü ja i ncja car ley. Menta dí bbüjtijü, i bbü hnar ley ca i mandadoguijü. Pe bbü ya xcrú tuju, ya jin da mandadoguijü tema ley. **2** Por ejemplo, hnar bbejña ca i bbü úr dame, xí ntjajtihui, tiene que da dyoti ca i bbejpi cár dame menta di bbüh-ca, como guegue-ca i mandadobi. Pe bbü da du car hñojø, car bbejña ya jin gui pehtzi to da mandadobi, porque ya xí ndü cár dame. **3** Menta i bbüjti cár dame car bbejña, jin gui tzö da yojmi pé hnar hñojø. Bbü da dyoti-ca, da ndujpite, rí ntzöhui da ttun cár castigo. Pe bbü ya xí ndü cár dame, ya jin gui bbüh ca hnáa ca mí mandadobi car bbejña. I pehtzi derecho da ntjajtihui pé hnar hñojø, cja jin da ndujpite. Nugøjü, dí jñejmü hnar bbejña ca i bbübi cár dame, como i bbüh ca hnaa ca i mandadoguijü.

4 Nuquiguejü, cjuäda, gui mbenijü, i bbüh ca hnáa ca i mandadoquijü, gue car Jesucristo, como ya xcú cuatijü jár dye. Cja bbü mí du guegue pü jar ponti, ncjahmü guehpü xpá tjajquibi cár ttzedi cü mfenijü cü ndí mbenijü máhmeto, göhtjo co ni ca bbeto um hmøyjü. Ncjapü, dá cojmü ncja hnar bbejña

ca ya xí ndu cár dámē. Guejjo guehcá gá nantzi car Jesucristo cja nuya pé xqui bbuy, ya xí nigui tocā gu yojm̄ ya. Nuya gu yojm̄ guegue cja gu hm̄upju hnar ddadyo hm̄uy ncja ngu ga ne ca Ocja. ⁵Cam hm̄uyu ca ndí bbuyu máhmeto, segue ndí ótiju ca rá nttzo. Mí eguij̄u cám nttzomfēnij̄u pa ndár ótiju ca jí mí tzö. Nu car ley mí ccaxquij̄u pa jin gua ótiju ncjapu. Nubbá, más mí ndo pura cám nttzomfēnij̄u, mí ntóxtihui car ley. Ncjahmu mí mföxihi car ley cja co cám mfenitsjeju, mí eguij̄u gua ótiju ca rá nttzo. Bbu jin di tjajquibi cár ttzedi cù nttzomfēni cù mí mandadoguij̄u, gua bbedij̄u, bbu. ⁶Pe nuya, ya jin gui mandadoguij̄u car ley ca ndí tenij̄u máhmeto, como ya xtú wembiju-ca ca gá ndu car Jesucristo. Nuya i mandadoguij̄u ca Ocja, como nuya dí yojm̄ cár Tzi Espíritu Santo. Masque ya xqui bbuh cam Jmuj̄u, pe ncjahmu ya xtí dyoj̄u libre.

El pecado que está en mí

⁷ ¿Ter bej nu dí xihquij̄u digue car ley, bbu? ¿Cja dí xihquij̄u jin gui tzö ca i mān car ley? Jina. Nugö jin gua padi écja már nttzo ca ndí òte? bbu jin di xijqui car ley, már nttzo ca ndár nejpi quí mejti cam hñohui. I bbuh ca hnar parte car ley pü jabu i mā: “Jin gui nejpi ca i pehtzi quer hñohui.” ⁸Masque rá zö ca i mān car ley, ncjahmu i ntóxtihui cám mfeni. Bbu jí bbe ndí padi te i mān car ley, jin tza mí egui cám nttzomfēni. Pe bbu mí tsijqui, jin gua nejpi quí mejti cam hñohui, nubbá, bi pura bi dyegui

cám nttzomfēni pa dá huimbí quí mejti. ⁹Máhmeto bbu jí bbe ndí ntiende ter beh ca i mān car ley, ncjahmu ndí bbuy rá zö, ndí inagö jin te ndí tu. Pe ca xtá padi te i mān car ley, nubbá, bi ndo dyegui cám nttzomfēni. Nubbá, cja dū padi ndí ndujpīte, cja mīr ntzöhui gua bbedi, ncja ngu ga mān car ley. ¹⁰Car ley i xijquij̄u, bbu gu cumplij̄u göhtjo ca i mā, da ttajquij̄u car nzajqui ca jin da tjegue. Pe nugö, bi xijqui mīr ntzöhui gua tu, como ndejma jí ndá cumpli. ¹¹Bbu ndí ójcō cù cosa cù i ccax car ley, mí egui cám nttzomfēni pa dá ótitjo cù cosa-cù. Cja bbu ya xtá òte, nubbá, dū padi, mīr ntzöhui gua bbedi.

¹²Pe nuçá, jí mûr nttzozqui car ley. Rá zö ca i xijquij̄u car ley, cja cù mandamiento cù ba eh pü jar ley, göhtjo i xijquij̄u gu ótiju ca rá zö, gu tenij̄u ca ncjuani, gu hm̄upju ncja ngu ga ne ca Ocja. ¹³Nuya, cja xtú ccacuhtij̄u, rá zö ca i mān car ley. Pe ndejma i xijqui car ley, dár ntzögobbe gu tu. ¿Cja i poni ncjahmu dûr nttzozqui car ley dí nesta gu tu? Jina. Jí úr nttzozqui car ley, como nuçá i xijqui ca rá zö. úr nttzozqui cám mfenitsjegö, como nucú i ntóxtihui car ley. Bbu ndí ójcō te i mān car mandamiento ca i cuati pü jar ley, más mí ndo egui cám nttzomfēni pa gua òti ca xí ccax ca Ocja. Eso, por rá ngue car mandamiento, dū padi, nttzeditjo rá nttzo cám mfenitsjegö.

¹⁴Dí padij̄u, car ley i xijquij̄u te i ne ca Ocja, cja co ja ncja rí ntzöhui gu hm̄upju. Pe nugö, jin dí bbujcō ncjapu, como dí bbujti nám cuerpo nā da dū cja co cám mfeni cù rí

hñeh ca bbeto um hmuy. Nucu, segue i egui gu öti ca rá nttzo. ¹⁵ Ca rá zö dí mbeni gu öte, jin dí öti-ca. Nu ca rá nttzo dí ne gu jegui, dí ötitjo. Ncjahmu jin dí bbütsjegö pa gu mandadotsje te gu ötigö. ¹⁶ Como dí patsje, jin gui tzö ca dí öte, ncjahmu dí bbübbe acuerdo car ley. Tzudi, dí padi, rá zö ca i man-ca. ¹⁷ I poni ncjahmu jin gui guejquitsjegö dí öti ca rá nttzo. Gue cum nttzomfeni cu i egui. ¹⁸ I bbüjti ca bbeto um hmuy ca ndí bbuy bbü jí bbe ndí eme car Jesucristo. Nugö, mbo um muy dí mbeni gu öti ca rá zö. Nu cu mfeni cu rí hñeh ca bbeto um hmuy, i tagui, jin gui jegui gu öti ca rá zö. ¹⁹ Porque cu cosa rá zö cu dí mbeni gu öte, jin dí öti-cu. Nu cu cosa rá nttzo cu dí ne gu jegui, guehcu dí ötitjo-cu. ²⁰ Bbu jin dí ötigö ncja ngü dar mbeni mbo um tzi muy, ncjahmu jin dí bbütsjegö. Nu cu nttzomfeni cu rí hñeh ca bbeto um hmuy, nucu, i egui gu ötitjo ca rá nttzo.

²¹ Nuya, ya xtú ccahti, bbü dí mbeni gu öti hnacosa rá zö, ndejma pé ba e pé hnacosa mfeni, i egui gu öti hnacosa rá nttzo. Ncjahmu dí yohti cum mfeni. ²² Bbu dí mbeni mbo um tzi muy te i man car ley ca rí hñeh ca Ocja, dí mpöjö, cja dí ne gu öti ca i ma. ²³ Pe jin gui hnaatjo ca dí mbeni. Menta dí bbüjti nam cuerpo na ya xí ttzoni, i bbü cum nttzomfeni cu i ntóxtihui cár ley ca Ocja, i ne da mandadogui. Nucu, rí hñejé ca bbeto um hmuy, cja i egui gu ötitjo ca rá nttzo. Ncjajmu i ntóxtihui cum nttzomfeni co ni cum mfeni rá zö.

²⁴ Tzi probegui, cja gu ncjagö bbü? Tocá da guezquigö yum nttzomfeni

yü i mandadogui cja co hnëh car ley ca i xijqui rí ntzöhui gu tu? ²⁵ Dí öjpi mpöjce ca Ocja, i bbü ca hnacca da guezquigö, gue cam Tzi Jmuyü Jesucristo. Bbu dí öte ncja ngu ga xijquitsje num tzi muy, nubbü, dí öjti cár ley ca Ocja. Pe bbü i mandadogui ca bbeto um hmuy, nubbü, segue dí ötitjo ca rá nttzo.

La vida que es por el Espíritu de Dios

8 Nugöyü, como ya xtú cuatiju jár dye car Jesucristo, ya jin da zujquiju car castigo ca mír ntzöhui di ttajquiju. Yu to xi hñeme guegue, ya jin gui jñegui da mandadobi cu nttzomfeni cu mí mbeni máhmeto. Nuya, dí yojmü car Espíritu Santo, cja guegue i mandadoguiju ya. ² Como ngü xtá cuatiju jár dye car Jesucristo, ya xtú jejmü ca bbeto um hmuyju. Bbu ndí bbütsjejü, mí egui cum nttzomfemiju pa gua ntóxtiju ca Ocja, cja ya xi ndár ma gua bbedijü. Pe nuya, car Jesucristo xí nzejquibi cár ttzedi ca bbeto um hmuyju. Guejto xí ddajquijü car Espíritu Santo pa gü yojmü-ca cja co hnacosa ddadyo nzajqui ca rí hñe guegue. ³ Rá zö ca i man cár ley ca Ocja. Bbu di jogui di cumpli yü cjháni göhtjo ca i man pü jar ley, nubbü, di dötiju car salvación por rá ngue nur ley. Pe jin dí jötiju gu cumpliju. Eso, car Tzi Ta jitzi bú pejni cár Tzi Ttu, bi cja ur cjháni, mí bbuh cár cuerpo ncja num cuerpoju. Bú eje bi guti ca rá nttzo ca xtá ötiju cja bi guezquiju cam castigoju. Ncjapü gá nzejquibi cár ttzedi ca bbeto um hmuyju ca mí egui gua ötiju ca rá nttzo. ⁴ Como gue car Espíritu Santo

i mandadoguiju ya, ya xí jogui gu hmupju ncja ngu ga man cár ley ca Ocja. Ya jin gui eguiju ca bbeto um hmuyju pa gu contrabiju car ley.

⁵Yu cjahni yu jin gui mandadobi car Espíritu Santo, rí ma úr muyju jøña yu cosa yu i cja hua jar mundo. Nu yu cjahni yu i yojmi car Espíritu Santo, nuyá i ungui úr muyju da jion cu cosa cu rí hñeh ca Ocja. ⁶Yu cjahni yu rí ma úr muyju jøña yu cosa i cja hua jar mundo, göhtjo xta bbej-yu. Nu yu to da mbeni ja drí mpøjmi car Espíritu Santo, da hmuy rá zö, cja da mehtzi car nzajqui ca jin da tjegue. ⁷Cu to i joni jøntsje yu cosa hua jar jöy, ncjahmu i ncontrahui ca Ocja. Como jin gui johui ca Ocja, jin gui tzö da dyötji ca i man cár ley-ca. ⁸Eso, cu cjahni cu i bbejtju ca bbeto úr hmuyju, jin gui tzö da hmubi ca Ocja o da mpøjmi guegue.

⁹Pe nuqueju, ya jin gui tzö gui hmupju como ngu nguír hmupju máhmeto, como ya xquí yojmu car Espíritu Santo. Nuya, guegue da mandadoquiju. Ca to jin gui yojmi cár Espíritu ca Ocja, jí úr mejti car Jesucristo. ¹⁰Nuquigueju, como i bbu mbo ir muyju car Espíritu ca rí hñeh car Jesucristo, guejtjo i bbu mbo ir muyju car ddadyo nzajqui ca rí hñe jitzi, cja ya xqui ccajtiquiju ca Ocja ncjahmu jin te guir tuju. Nu quir cuerpoju, ndejma da du, como jí bbe i ccuzquiju car castigo ca bi ttun ca primero úr hñojo bbu mí dyötji ca rá ntzo. ¹¹Nuqueju, ya xquí yojmu cár Tzi Espíritu ca Ocja, cja guegue-ca xí ddahquiju hnar tzi ddadyo nzajqui. Yu pa ya, guí bbejtju yir cuerpoju yu i tu, pe drí

gax ya, ca Ocja da xoxquiju, göhtjo co quir cuerpoju, cja da ddahquiju car nzajqui ca jin da tjegue, como ngu gá xox car Jesucristo bbu ya xquí du.

¹²Nuya, um cjuadaquiju, ya xtú otiju compromiso gu pejpu ca Ocja. Ya jin gui tzö gu hmupju ncja yu cjahni yu i joni jøña yu i cja hua jar mundo. ¹³Porque bbu gui jñeguiju da mandadoquiju cu ntzomfeni cu rí hñeh ca bbeto ir hmuyju, nubbu, xquí tuju bbu, göhtjo co quir tzi muyju. Pe bbu gui jñeguiju da mandadoquiju car Espíritu Santo, nubbu, xquí hmupju göhtjo úr tiempo. Nubbu, xta ttzejqui cár ttzedi ca bbeto ir hmuyju, cja co cu ntzomfeni cu mí yojmi.

¹⁴Í bajtzi ca Ocja cu cjahni göhtjo cu i jñegui da mandadobiju car Espíritu Santo. ¹⁵Máhmeto, bbu jí bbe ndí cuatiju jár dye car Jesucristo, ndí tzuju ca Ocja, cja ndí bbupju ncja muzo cu i hmepi gá fuerza göhtjo ca da mafi. Pe nuya, ca ya xtár yojmu car Espíritu Santo, nuya dí tzö mbo um tzi muyju, um Tzi Taju ca Ocja, cja nugöju, í bajtziguiju ca. Nuya, bbu dí nzojmu ca Ocja, dí xijmu ncjahua: “Nuque, um Tzi Taquije.”

¹⁶Nuya dí padiju mbo um tzi muyju, ya xtú cja í bajtziguiju ca Ocja.

¹⁷Como ya xtí padiju, í bajtziguiju ca Ocja, guejtjo dí padiju, ba eh car pa bbu xtá cjaipi um mejtigöju göhtjo cu cosa rá zö cu i pehtzi cam Tzi Taju, como dí yojmu car Jesucristo cja mero guegue úr Ttu ca Ocja. Bbu dí sufriju hna tzi tujqui hua jar jöy por rá nguehca dár yojmu car Cristo, nubbu, gu yojmu guegue pu jar jitzi hneje, gu nûgöju göhtjo ca rá zö.

¹⁸Bbu dí sufriju hna tzi tujqui menta dí bbupjuu hua jar jöy, gu mbeniju, jin gui ngu, más drá ndo ngu cu cosa rá ndo zö cu gu nugöju bbu pé xtu eh cam Tzi Jmuyu Jesus. ¹⁹Göhtjo yu dí ccahtiju hua jar mundo, yu cosa yu xí dyotí ca Ocja, ncjahmuu göhtjo i tohmi car pa ca xí ma guegue, bbu xta tjojqui ddadyo. Nubbu, ntero da mbödi pa da hmuy rá zö. Car pa-ca, nugöju yí bajtziguiju ca Ocja, gu jñejmuu car Jesucristo. ²⁰Bbu mí dyotí ca rá ntto ca primero ur hñoju, bi ttzon cár hmuy guegue, cja guejtjo bi ttzoni göhtjo yu i cja hua jar mundo. Masque jin tema nttojqui mí pehtzi cu zuwe co cu pe dda cosa cu mí bbuy, pe ca Ocja bi mandado göhtjo di sufri parejo, yu cjahni cja co yu planta cja co göhtjo tema zuwe yu i bbujcua jar jöy, hasta bbu xta zoh car pa ca xí man ca Ocja. Nubbu, cja da guhtzibi car sufrimiento i tzöju cja da jojqui göhtjo di ddadyo. ²¹Bbu xta ncja-ca, da ujtjo yu cosa rá ntto yu i bbujcua jar mundo yu pa ya. Da hmupjuu rá zö cu zuwe, ya jin da sufri, göhtjo co cu pé dda cosa cu dí ccahtiju. Guejquitjogöju, yí bajtziguiju ca Ocja, gu hmupjuu libre, ya jin gu nuju ca rá ntto. Gu ndo hmupjuu rá zö, hasta gu jñejmuu ca Ocja. ²²Desde car pa ca bi ttun car Adán cár castigo hasta rá pa ya, i sufritjo göhtjo yu te i bbujcua jar mundo, ncjahmuu göhtjo i cjuti ca rá ntto ca bi dyotí car Adán, cja göhtjo i tohmi, éncjahmuu da zuh car pa bbu xta ccahtzibi ca rí sufriju? ²³Cja jin gui joñu cu zuwe cja co cu pe dda cosa cu xí dyotí ca Ocja i sufri. Hnequigöju, dí sufriju

hneje, masque dí yojmu cár Tzi Espíritu ca Ocja. Por rá nguehca dár bbujtiju co num cuerpouu nu da du, eso, dí sufritjoju. Nu car Espíritu Santo i xijquiju, ya xpa eh car pa bbu xta mböj num cuerpouu. Nubbu, xta cccazquigöju göhtjo ca dí sufriju cja gu cjaju ncja ngu ca Ocja. ²⁴Guehca xtá cuatiju pu jár dye car Jesucristo, eso, ya xtí padiju, ba eh car pa bbu xtá ncja ju ncja ngu guegue. Nubbu, xtá pehtziju car nzajqui ca jin da tjegue, göhtjo co yum cuerpouu. Pe jí bbe i ttun yum cuerpouu car nzajqui ca jin da tjegue. Bbu ya xcri pehtziju-ca, jin di nesta te gua tohmiju. ²⁵Nugöju, ndejmu dí emeju, gu mbödiju pa gu jñejmuu ca Ocja, masque jí bbe dí padiju ja gu ncagöju bbu xta ncja-ca. Pe dí emetjoju, cierto da ncja, cja dí tohmiju car pa bbu xtá nuju car nzajqui ca jin da tjegue, göhtjo co yum cuerpouu.

²⁶Menta dí bbujtiju hua jar jöy co num cuerpouu nu xí ttzoni, jin gui nzejquiju, cja jin dí padiju ja gár nzojmu ca Ocja ncja ngu rí ntzöhui gu nzojmu. Pe dí yojmu car Tzi Espíritu Santo, cja guegue i föxquiju. Nucá i juiguiguiju como i cccatiguiju, jin gui nzejquiju. Bbu dí oraju, i föxquiju, porque jin dí pacoju ter beh ca i nesta gu xijmu ca Ocja. Nu car Espíritu Santo i pohtzi cum mfeniju, i xih ca Ocja. Guejtjo i juhtzi quí mfenitsje guegue, i xih ca Ocja cu dda mfeni cu jin dí padiju gu öpjiju ca Ocja. ²⁷Nu cam Tzi Taju jitzi i padí ter beh ca dí mbeniju mbo um tzi muyju. Guejtjo i patib*u* quí mfeni car Espíritu Santo, bbu ga

ñá guegue-ca por rá nguejcójü. Guejti car Espíritu Santo, i pätibi quí mfeni cam Tzi Taju jitzi hneje. Ncjahmu i mbeníhui yojmi, cja i cojmi car acuerdo, ter beh ca da dyötiguiju.

Más que victoriosos

²⁸Car Tzi Ta jitzi xí nzojquijü pa xcá cjagui í bajtziguiju, ncja ngu gá mbeni guegue, ya ma yabbü. Guejcójü xí juanquijü, eso dí nejü ca Ocja. Guegue ba mandado göhtjo ca te dí tjojmü hua jar mundo. I cjajpi da sirveguijü-ca pa gu cjajü ncja ngu ga mbení guegue cja pa gu hmüpju rá zö. ²⁹Ya má yabbü, ya xi mí pah car Tzi Ta jitzi to ca cjahni ca di guati jár dye cár Tzi Ttu. Xí juajni ca cjahni-cü, cja segue i nú pa da xöjpi da cjajü ncja ngu cár Tzi Ttu. Masque mí ddatstsje cár Tzi Ttu ca mí hñih ca Ocja, pe guegue-ca bi mbení ter beh ca di dyöte pa di nigui pé dda quí bajtzi drá ngu.

³⁰Ca Ocja bi juajni ca dda cjahni pa gá cjajpi í bajtzi, cja guejtjo bi nzojtibi quí møyju. Eso, bi hñemebi nár palabra ca Ocja ca cjahni-cü, cja ncjapü gá ccuhtzibü ca rá nttzo ca mí tjujü. Cja pé xí man ca Ocja, da cuajti quí bajtzi pü jabü bí bbü guegue pa drí yojmü cár Tzi Ttu cja da jñejmu-ca. Guejcójü, como ngu xtá emejü car Jesucristo, ca Ocja xí cjaguiju göhtjo yü favor-yá.

³¹Bbü dí mbeníju göhtjo yü xí dyötiguiju ca Ocja, dí padijü, da segue da möxquijü, cja jin gu tzujü ca te da contraguijü. ³²Cam Tzi Taju jitzi jin gá jiójqui cár Tzi Ttu, bi dö por rá nguejcójü. Eso, dí padijü da ddajquijü göhtjo ca pé

dda cosa ca dí nestaju. ³³Masque di bbüh ca dda cjahni ca da jiøxquijü, dí tudijü ca rá nttzo, nu car Tzi Ta jitzi ya xí juajnquijü pa xcá cjagui í bajtziguiju. Guejtsje guegue xí xijquijü, ya jin da dyüjtiguiju ur huenda digue ca dí tjujü. ³⁴Nuya, jin to i pehtzi derecho da xijquijü gu bbedijü. Como guegue car Jesucristo bi du cja pé bi jñä ár jñä pa gá nguzquijü ca xtú ötijü, cja nuya, bí bbüh pü jabü bí nccahthihui cár Tzi Ta. Segue i nzoh ca Ocja por rá nguejcójü. ³⁵I ndo neguiju car Cristo. Masque gu sufrijü rá ngu, masque da bbedi göhtjo ca dí pehtzijü, o da ttötiguiju tujni, o gu tzöju tjujü, o da tjeh cám dajtujü cja jin te gu jajü pa pé gu töjmu, o bbü da cjöbiguiju, masque xín dá bböjtiguiju, göhtjo yü cosa-yü jin da zinguiju jár dye car Cristo. ³⁶Cierto da jnuguiju rá nttzo por rá nguehcá dár teniju car Jesucristo, ncja ngu mäm pü jar Escritura:

Guehcá dár tenquije, göhtjo ur pa dí hñoje peligro da bböjtiguije,

Ncjahmu dí jñejme ca dejti, ya xí fembi ncjahmu da bböhti.

³⁷Pe jin gu uxi um møyju, masque da ttötiguiju göhtjo ya cosa-ya. Gu segue gu yojmü car Cristo hasta ár gatzi, como guegue bi du por rá nguejcójü, cja jin da jieguiju.

³⁸⁻³⁹Nuya, dí padi ntjumü, jin to i bbü, cja jin te da ncja ca da zinguiju pü jár dye car Cristo.

Bbü xtá tjujü, o bbü gu segue gu hmüpju hua jar jöy, gu hmüpju ár dye guegue. Jin gui bbü tema ángele o tema ttzondaji drá nzedi pa da weguiju car Cristo. Göhtjo

ca dí nuju yu pa ya, cja co cu da ncja cu cjeya cu ba eje, cja co hnēh cu dda ángele cu jin gui ójti ca Ocja, gue cu i ina yu cjahni, bí mandado pu jar jitzi o nu hua jar jöy, göhtjo-yu, jin da weguiju ca dár hmüpju car Cristo. Göhtjo tema cosa ca di nigui hua jar jöy, ncja ngu yu i tzu yu cjahni, jin gui tzö da weguiju ca dár hmüpju ca Ocja, como ya xí ujtiguiju cam Tzi Jmuju Jesucristo, te tza ngu ga neguiju car Tzi Ta jitzi.

Dios ha escogido a los de Israel

9 ¹⁻²Cierto ná dí mangö hua, como xtú eme car Jesucristo. Jin gui tzö gu ma bbetjri. Dí yobbe car Espíritu Santo, cja guegue i padi, i ndo ddajqui ur dumuy bbu dí mben cum minga-israelitaje, como ya xní ma da bbediju. ³Dí mangö, xín di jogui gua mbombi cum minguje pa nugö gua bbedi cja guegueju di cuatiju jár dye car Cristo cja di totiju car salvación. Dí ndo negö-cu, um cjuadagö-cu, hnaadi cam cjigöje. ⁴⁻⁵Guejto israelita-cu, ca Ocja bi juajni pa di cjajpi í bajtzi. Bbu xcuí bóniju pu jar jöy Egipto, ca Ocja bi ndo mötzi. Bi ujti ja i ncja cár ttzedi cja co cár tjay. Gue cu cjahni israelita, ca Ocja bi dyotihui compromiso. Guegue-cu bi ttuniju car ley ca rí hnëh ca Ocja. Guejto bi ttuji cu israelita ja ncja rí ntzöhui da tsjöjtibi ca Ocja, cja guegue-cu bi ttzoquibi cu promesa cu xquí tsjih car Abraham. Guejto hnëjé mí israelita cu ndom titaje cu i ttihtzibi por rá nguehca mír yojmi ca Ocja. Cja bbu mbú ecua jar jöy cár Ttu ca Ocja, bi hmuy gá

israelita hnëjé. Guegue mür Cristo ca ndí tóhmije. Rá ndo zö quí mfeni cam Tzi Taju jitzi cja i mandadobi göhtjo yu i ncja. Rí ntzöhui gu xöjtibiju göhtjo cu cjeya cu ba eje, nim pa jabu gár tzöyaju, amén.

⁶Már ngu cu israelita jí xcá ne xcá hnemeju ¿cja xcuí hnë Ocja car Jesucristo? Nu ca Ocja ndejmá xí cumpli cu promesa cu bi xih cu israelita. Pe i bbuh cu to jin gui ne da hnëmeju, como i bbuh cu dda israelita cu jí í bajtzi ca Ocja. ⁷I bbuh cu dda cjahni cu guá hnëjé digue cár cji car Abraham. Nu ca Ocja i cqahi cu cjahni-cu ncjahmu jin te dür ncjahui car Abraham, como jin gui eme ca Ocja ncja ngu nguá hnemé guegue-ca. Nu cu cjahni cu ntjumuy í bajtzi car Abraham, gue cu cjahni cu i jñejmi car Isaac. Ncja ngu gá man ca Ocja, bbu ngá xih car Abraham “Gue quí bajtzi car Isaac da ttun car herencia. Xtá nugö-cu ncja ir bbejto-cu.”

⁸Ncjapu dá padiju, jin tema cjahni di cja úr bajtzi ca Ocja jontsjetjó porque xtrú hmuy digue cár cji car Abraham. Gue cu cjahni cu di jñejmi car Isaac, di cjajtú í bajtzi ca Ocja. Nu car Isaac bi hmuy porque xquí man ca Ocja di hmuy. ⁹Ca Ocja bi xih car Abraham di hmuh hnár ttu, bi xifi ncjahuia: “Bbu xta zuh car tiempo ca ya xtú mangö, xta hmuh cár ttu car Sara.” Cja bi hmuh car Isaac, ncja ngu gá man ca Ocja.

¹⁰Nuya pé gu mbeniju ja ncja gá hmuh quí ttu car Rebeca, cár bbejña ca ndom titaje Isaac. Cu yojo quí ttu car Isaac bi hmuy, hnaadi cár mehui, hnaadi cár tahui. Guejto

bi hmuy hnaadi car ttodi. ¹¹Bbu jí bbe mí hmuh quí bajtzi, bi tsjih car Rebeca ja di ncja-cu. Jí bbe mí fadi ćcja di dyøti ca drá zö-cu? ćcja huá di dyøti ca drá nttzo? Nu ca Ocja bi juajni ante que di hmuy, ja ndrá nguehcá más di mötzi. Bi dyøti ncjapu pa gár padiju, bbu ga nuguiju ca Ocja co ni cár ttijqui, jin gui por rá nguehcá xcrú ötigöju ca rá zö. Guetsje ca Ocja i ccahtí toca da mädi, toca da nzofo pa da hñeme guegue. ¹²Bi tsjih car Rebeca digue cu yojo quí ttu cu di hmuy: “Ca hnnaa ca bbeto da hmuy, da cjá ncja hnnaar muzo, da pejpi ca hnnaa ca drí gatzi da hmuy.” Gue car Esaú bbeto bi hmuy, cja gá ngax ya, car Jacob. ¹³Bi ncjá ncja ngu ga mam pü jar Escritura, bi man ca Ocja, “Xtú mbentsje ne nur Jacob, cja nur Esaú, jiná-nú.

¹⁴¿Xi ya bbu? ¿Ter beh ca gu mbeniju digue ca Ocja? Ncjahmu jin gui nuguiju parejo. ¿Cja huá jin gur jogui Cjáa? Ndejmá urre jogui cjahni guegue, porque más i ndo padi, ter beh ca rá zö, cja ter beh ca jin gui tzö. ¹⁵Gu mbeniju car palabra ca bi tsjih car Moisés. Ca Ocja bi xifi ncjahua, ina: “Gu ccahtigö rá zö car cjahni ca xtá ne. Car cjahni ca dí ne gu xijqui, xtá föxcö-ca.” ¹⁶Eso, dí padiju, i juiguiguiju ca Ocja, por rá nguehcá xcá mbentsje xcá dyøte ncjapu. Masque gu embi um mayju gu ötiju ca rá zö, jin gui guehcá i cjaipi ca Ocja da nuguiju rá zö. Guegue i mantsje ja ncja drí nuguiju. ¹⁷I mam pü jar Escritura ter beh ca bi mben ca Ocja digue car Faraón. Guegue-ca mür rey pü jar jöy

Egipto. Car Faraón bi ndo døxti ca Ocja, cja nuca mbá pempi rá ngu castigo. Nu ca Ocja bi xifi: “Masque jin guí ne gui dyøjtigui, guejco dú mandado bi ttixqui gá rey, cja xtú tzejtitjo ca dé guír ugui, pa santá da fadi te tza rá nzejquigö, cja pa da dyøde göhtjo yu ejahni hua jar jöy, toguigö, dúr Jehová.” ¹⁸Guegue ca Ocja i mbentsje to car ejahni ca i ne da mötzi. Nu car ejahni ca i tøxti ca Ocja, guegue-ca i øhtibi fuerza pa más da ndo cja urre necio, da hñemindo da dyøti ca rá nttzo.

¹⁹Ya xtú ccahtiju, i mandado ca Ocja, ja da ncja cam hmuyju. I bbuh cu to di hñöni ncjahua: Nubbá, ćdyocá pé i xijquiju ca Ocja dí ötiju ca rá nttzo bbu, cuando guejtsje guegue xí mandado gu cjaju necio? Bbu xí mandado ncjapu, jin gui tzö gu cjaju jogui ejahni, bbu. Ncjahuu ga man cu dda ejahni. ²⁰Nuquigue, gúr ejahnitjo, jin gui tzö gujtzohmi ca Ocja. Guegue i jñejmi hnnaar dyøti-moji cja nugöju dí jñejmu car pejöy. Bbu di jogui di ña hnnaar xaro, cja di xih car hñøjö ca bi dyøte: “Jin gui parecegui ca xquí dyøjqui ncjahua,” eter beh ca di sirve bbu di ma ncjapu? ¿Cja i mandadotsje car pejöy te da ncjapu? ²¹Car dyøti-moji i pehtzi derecho da ejajpi car pejöy ncja ngu ga mbeni. Co mismo car pejöy, puede da jojqui hnnaar bbada drá tzi zö ca di pehtzi lujo, cja co hnnaar jomoji tjojo, ca di nigui gá jöytjo. Guetji ca Ocja i pehtzi derecho da ejaguiju ncja ngu ga mbentsje.

²²Ca Ocja xí dyøti cu dda ejahni cu i jñejmi jomoji. Guegue jim be ga undi urre cue ca rí dyøti ca rá

nttzo cu cjahni-cu. I tóhmi rá ngü tiempo, xajma da repentiju, masque ya xí mbádi guegue desde ya má yabbu, drí gax ya, da un cár castigo cu cjahni-cu. Ca Ocja xí dyotí cu cjahni-cu pa gu pádiju, tiene que da castiga cu to i ncjapu, cja guejtjo pa gu pádiju te tza rá nzedi guegue. ²³Guejtjo xí dyotí cu pé dda cjahni cu i jñejmi cu moji cu xí tjojqui gá lujo. Cu cjahni-cu, ya má yabbu bi mbén ca Ocja di un cár nzajquiju cja di jojqui pa drí hmúpju guegue pu jabu rá tzi zö. Gue cu cjahni cu xí nzojtibi quí tzi múyiju cja xí ngühtzibiju ca rá nttzo ca mí tuju, pa drí nigui te tza ngü cár tzi ttijqui ca Ocja. ²⁴Nugoju, como ngü xtá cuatiju jár dye car Jesucristo, dí jñejmu cu moji rá tzi zö. Ca Ocja jí xcá nzofo hnaatjo ur raza. Nu guegue xí nzojquiju, ddaaguigöju, dí judioju, yu pé ddaaguigöju, dí hnahní cjahniju.

²⁵Ya má ndo yabbu, bi mbén ca Ocja di nú co ni cár tzi ttijqui cu cjahni cu jin gui judio, ncja ngü nguá nú cu judio máhmeto. Bi má ncjapu car profeta Oseas pu jár libro ca bi dyote, ina:

I mán ca Ocja,
Cu cjahni cu jí mí tengui, nuya
gu xijmu um cjahni-cu,
Cu jí ndí nejma, gu ne ya cá.

²⁶Nu pu jabu bi tsjih cu cjahni cu jí mí emegui:
“Nuquigueju, jí í cjahniquiju ca
Ocja,” guehpu pé xta tsijimu,
“Nuya, í bajtziquiju ca Ocja ca
ntjumhy i bbu.”

Ncjapu gá tsjih cu cjahni cu jin gui judio. ²⁷Guejti car profeta Isaías bi má te di ncjajpi yu cjahni israelita,

bi hñína: “Masque xí ngujqui quí bajtzi car Israel, ya xná ngü, ncja cu bbomu cu i bbom pu jár nttzaní car mar, pe göhtjo da ncastiga, cja tengúto da huete.” Tzudi, ya xi mí páh car Isaías, di tengudi cu cjahni israelita cu di dötiju car salvación.

²⁸Ncja ngü ga mán car profeta, ya xí mán ca Ocja, ya xta castiga yu cjahni yu i bbujcua jar jöy, ya jim pé da dóhmi. Bbu xta ncja-ca, guegue xta hna pun cu cjahni cu jí xcá ne xcá hñemeju, ya jin da jiøjqui-cu. ²⁹Ya xí nzúh ca bi mán car profeta Isaías pu jar libro ca bi dyote. Bi má:

Car Tzi Ta jitzi i mandadobi
göhtjo yu i bbuy, cja guegue
xí castigaguiju, í cjahniguiju.
Rá ngü cu xí puni, cja
jøñaguigöju te dí ngüdiju, xtú
huetiju.
Bbu jí xtrú weguiju ca Ocja,
tenguguiju pa gua hmújtiju,
ya xcrú mpuniju, dí göhtjoju.
Ya xcrú bbuediju ncja ngü cu
mingu Sodoma cja co cu
mingu Gomorra.

Ncjanu gá mán car Isaías digue cu cjahni israelita.

Los judíos y el evangelio

³⁰¿Xi ya bbu, ter beh cá xí ncja ya bbu? Yu hnahní cjahni yu jí mí pádiju ja i ncja ca Ocja, cja jí mí joni ja drí deniju guegue, guejyu xí nú rá zö. Por rá nguehcá xcá hñemebiju cár tzi ttijqui ca Ocja, xí nccúhtzibiju ca rá nttzo ca mí tuju.

³¹Nu yu cjahni israelita, guegue-yu mí ten cár ley ca Ocja cja mí inaju, di ncjapu drí dötiju car salvación. Pe ndejma jin gá jiöti di cumpliju

göhtjo ca i mān car ley, por eso jin gá ndöti ca mí jonijü. ³² ¿Te rá nguehca? Porque mí mbeníjü, jöntsje co ca mír dyötijü ca i mām pü jar ley, co guehcä di tzöpijü ca Ocja, cja di datsjejü car nzajqui ca jin da tjegue. Eso, bbü mbú eh car Jesús hua jar jöy, már ngü cü cjahni israelita jin gá ne gá nguatiyü. Bi zaniju, ncja ngü xquí mān ca Ocja, ya má yabbü, pü jabü i ñä digue car ndo mēdo ca bi ttzani. ³³ I māncjahua pü jar Escritura:

Nujmajü, xtá pempi cùm cjahni ca hnam jmandadero ca xtú itzi pa da guhtzibi ca rá nttzo ca i tuju.

Nu car cjahni-cä, da jñejmi hnár ndo mēdo pü jabü da mfehtzijü, como jin da ne da hñemejü-cä. Drá ngü cü israelita da zandiju. Nu cü to da hñeme, xtá nugö rá zö, cja jin da bbedijü.

10 Nuguejü, um hñohuiquijü, te tza dí mbén cùm minga-israelitaje. Cjuá dí nzoh ca Ocja pa da cjajpi da hñemejü car Jesucristo, cja da dötijü car nzajqui ca jin da tjegue. ²Dí padi, cja dí dö nám palabra, cierto i ndo uni í mayjü pa da dyöti cü mandamiento cü xí ttuni. I inaju, da ncjapü drí dajmü car nzajqui ca jin da tjegue. Pe jin gui padijü ja ncja ga ttajquijü-cä. ³Gueguejü xí mbeni, da zöhti ca i mām pü jar ley ca bi mān car Moisés, pa ncjapü drí dapijü cár favor ca Ocja. Pe jin gui padijü ja i ncja cár mfeni ca Ocja. Como xí man ca Ocja, gue cü cjahni cü da hñemébi cár tzi ttijqui da ttundi car nzajqui ca jin

da tjegue. ⁴Car Jesucristo bú ejé, bi dyöte göhtjo ca i mām pü jar ley ca bi zoguiguije car Moisés. Cja nuya, göhtjo cü to da ne da guati jár dye guegue, guejti-cá, da nü ca Ocja ncjahmü xtrú cumpli göhtjo ca i mān car ley.

⁵Bi mān car Moisés, car cjahni ca da zöjte göhtjo ca i mām pü jar ley, guegue da döti car nzajqui ca jin da tjegue. ⁶Pe hnahnö ga xijquijü car tzi ddadyo jñä ca dí emejü. Car jñä-cä i xijquijü, jin gui nesta gu hñöntsjejü: “⁷Toca da box pü jitzi pa du tzí ca hnáa ca da salvaguijü?”

⁷Guejto jin gui nesta gu hñöntsjejü: “⁸Toca da gah pü jabü rí ma yü ánima, pa du tzí pü ca hnáa ca bi du por rá nguejcöjü?” Jin gui nesta gu majmu ncjapü, como ya xí nigui car Cristo, ya xí ndü, cja pé xí jñä úr já pa xcá salvaguijü. ⁹Ja i ncja car tzi ddadyo jñä ca dí emejü? I mām pü jar Escritura ja i ncja, ina: “Jin gui ntji pa gui ntiende o pa gui xih hner míngä-cjahnhui.” I xijquijü ncjahua: Ca Ocja co ni cár tzi pöjö i undi car nzajqui ca jin da tjegue göhtjo yü to i cuati jár dye car Jesucristo. ¹⁰Bbü guí eme göhtjo mbo ir mhy, bi du car Jesucristo pa gá nguti ca rá nttzo ca xcú dyöte, cja pé bi nantzi pa gui padi, ya jin te guí tü, nubbü, da guzqui ca rá nttzo ca xcú dyöte. I nesta gui hñeme ncjapü cja guejto gui xij yü pé dda cjahni to quer Tzi Jmü guí eme. ¹⁰Porque bbü dí cuatijü jár dye car Jesucristo, ca Ocja i nuguijü ncjahmü jin te gri tiju, cja bbü jin dí pehtzi um tzöjü gár xij yum hñohuijü toca dí emejü, ca Ocja i ddajquijü car nzajqui ca jin da tjegue.

¹¹I xijquiju car Escritura: “Göhtjo cu to da guati pu jár dye guegue, da guhtzibi ca rá nttzo ca xí dyøte. Ya jin da ncastiga-cu.” ¹²Ca Ocja i nú parejo yu judio cja co yu cjahni yu jin gui judio. Hnaadi ca Ocja bi dyøte göhtjo yu raza yu cjahni, cja i juijqui göhtjo tema cjahni ca i öipi da nú co ni cár tzi ttijqui. Bbu to i jon ca Ocja göhtjo mbo úr muy, guegue-ca co ni cár tzí pøjö da uni göhtjo ca i nesta. ¹³Da ncjá ncja ngu ga mam pu jar Escritura: “Car cjahni ca da guati cam Tzi Jmuu, cja da dyöipi da nú co ni cár ttijqui, da ttun car nzajqui ca jin da tjegue.”

¹⁴Pe i bbu cu dda cjahni cu jí bbe i emeju car Jesucristo, eso, jin gui tzö da dyöipi da möxju. Cja bbu jí bbe i ødeju to car Jesucristo, cja ncja drí guatijuu pu jár dye, bbu? Cja bbu jin to da ma du xijmuu, cja ncja drí dyødeju bbá? ¹⁵I nesta da ttun cár cargo cu dda cjahni pa da má du nzofo. Nubbu, da zuh ca i mam pu jar EscriTura: “Da ndo mpöh cu cjahni cu rá bbu pu jabu da zötí quí jmandardero ca Ocja. Xta mpøjö, como xta tsijmuu car tzi ddadyo jña.”

¹⁶Pe ndejma i bbu cu dda cjahni cu xí dyødeju car tzi ddadyo jña digue car Jesucristo, pe jí xcá ne xcá hñemeju. Xí cjaju ncja ngu gá man car profeta Isaías bbu mí nzoh cu israelita, bi hñina: “Nuque Ocja, xtú xij yir cjahni quer tzi palabra, pe jin gui ne da hñemeju.” ¹⁷I nesta da tsij yu cjahni to car Jesucristo cja co te rá nguehca bú eje, pa da dyøde cja da guatijuu pu jár dye guegue.

¹⁸Cja pé da hñon cu dda cjahni: “¿Cja jí bbe i øh cu cjahni israelita to

car Jesucristo cja co te rá nguehca bú eje?” Dí mangö, jaa, göhtjo xí dyøde, como xí ndo ntungui car palabra, ncja ngu ga man ca hnar salmo, ina:

Car palabra ca bi majmu, bi ntungui göhtjo hua jar mundo, Hasta cu cjahni cu rá bbu pu jabu rá ttze nur jöy, göhtjo-cu ya xí dyødeju.

¹⁹Xi bbu pé da ttönguigöju: “¿Cja jin gá ntiendeju cu cjahni israelita car palabra ca bi tsijmuu?” Dí ingö, bi ntiendeju, pe jin gá ne gá hñemeju. Cja nuya, ya xí ncjá ncja ngu ga man car Moisés pu car Escritura. Nuya, ca Ocja xí cuajti cu hnahno cjahni cu jin gui israelita. I ina:

Nuya, gu cuajti cu cjahni cu jin dá juajni mahmeto pa gua cjajpi um bajtzi, cja nuqueju, um cjahniquiju, da hñó quir mfeniju.

Gu juijqui cu cjahni cu jí mí pádi toguigö, cja nuqueju, da ddahquiju ur cue.

²⁰Guejti car Isaías bi man tzi claro, ter beh ca di ncja. Bi hñina:

I man ca Ocja: “Cu cjahni cu jí mí jonguigö, guehcu xí ndöjqui, Cja cu cjahni cu jí mí padiju, cja dí ncjagö? guehcu xtú cuajti pa gu hmupje.”

²¹Nu cu israelita xí ndøxtiju ca Ocja, ncja ngu ga mam pu jar Escritura. I man ca Ocja: “Cjaatjo ndár mvitabi ym cjahni di guajqui. Cjaatjo ndár xijmuu dí ne-yu. Nuya, xí uguitjo, jí xcá ne xcá ndenguiju.”

Los de Israel que son salvos

11 Nuya, pé gu mbeníju:
¿Cja ya xí dyen cu cjahni

israelita ca Ocja. Porque nugö, dûr israelita hneje. Xtá eh pü jár cji car Abraham co pü jár cji car Benjamin. Guegue-ca mûr mboxbibejto car Abraham. ²Ya má ndo yabbü bi juajni ca Ocja cü cjahni israelita pa di cjajpi í cjahni-cü. Nuya, ncjahmü xí weguehui, pe jí xcá dyen-cü, como i bbü tengü cu i emetjo. Yu pa-yá, xí ncjá ncja ngu cár tiempo car Elías. Nucä bi nzoh ca Ocja, bi quejabi quí minga-israelitajü, inä: ³“Nuque, Ocja, ya xí jiequi göhtjo cu pé dda cjahni israelita. Ya xí möhti göhtjo cu pé dda quir mëfi cu mí man quer palabra. Ya xí juaqüi cu altar pü jabü mí jñajtiqui zuwé. Jønguitsjegö xtú huete, dí ddatjse dí tenquigö, cja ya xqui ne da möjtigui hneje cum contra.” ⁴Gui mbënijü, ja ncja gá ndäh ca Ocja, bi xij car Elías: “Dyo guí cja ndumü, xtú wejquigö siete mil hñøjö cu i tenguitjo, cu jí xcá ndané car ídolo Baal.” ⁵Ncjadipü hneje nár tiempo-ya, i bbü yu ddaaguigöje dí israelitaje xtú emeje, car Jesús guegue ur Cristo ca xpá mejni ca Ocja. Guejtse ca Ocja bi juanquije por rá ngue cár tzi pöjö, cja xí nzojtigui um tzi møyje pa xtá emeje car Jesucristo. ⁶Masque i bbü cu ddaaguigöje, máhmeto ndí mpeguije, ndí øtije göhtjo ca i man car ley, jin gá juanquije ca Ocja por rá nguehcä. Bi juanquije jøntsjetjo porque xquí mbentsje di nuguije co ni cár tzi ttijqui.

⁷ ¿Ter beh cä xí ncja ya bbü? Már nugü cu cjahni israelita cu mí joni ja drí datsjejü car nzajqui ca jin da tjegue, pe jin gá nzøhtzijü. Nu cu tengüdi cu cjahni israelita cu

bi juajni ca Ocja, guegue-cü bi döti ca mí jon cu pé ddaa, como bi hñemebijü cár tzi ttijqui ca Ocja. Nu cu pé ddaa xí cjajü necio, jí xcá ne xcá hñemejü cja güí hñeh ca Ocja car Jesucristo? ⁸Xí nzudi ncja ngu ga mam pü jar Escritura:

Guejtsje ca Ocja bi cjajpi cu cjahni bi mëmuyjü,
I bbüh quí döjü, pe jin gui padí ter beh cä i ccähtjü.

I bbüh quí gujü, pe jin gui ntiende ter beh cä i tsijimü.
Rá ngu cu israelita i ncjáu pü hasta rá pa ya.

⁹ Guejtjo xí cjajü ncja ngu gá man car David di ncja. Bi hñina:

Xí ndo ttunijü rá ngü bendición.
I jmuntzijü, cja i øtijü mbaxcua. I mbënijü, rá zö ga hmüpü.

Pe nuya, ca Ocja, da hna mëmpi cár castigojü.

¹⁰ Da cjajpi da ncjajü ncja hnare godö,
Masque i yoti car jiahtzi, pe gueguejü i bbüjtijü jar bbexuy.
Da cjajpi da ncjajü ncja hnare döhtji ca jin gui tzö da hmöy derecho,
Göhtjo ér vida da duujü ca rá nttzo ca xí dyötijü, nim pa jabü drí ccuhtzibijü.

¹¹ Gue car castigo-cä xí nzuh cu israelita cu jí xcá nejü car Cristo ca bú pejni ca Ocja. Ca Ocja jin gui nú rá zö cu cjahni-cü. I jñejmu cjahni cu xí mfehrtzi pü jar hñü jabü má pa. Pe nuya, rí ntzöhui gu hñontsjejü: cja ya jin da jogui pé da nantzijü? Da jogui. Ndejma ba eh car pá bbü xta hñemejü. Guehcä jí xcá ne xcá hñemejü car Cristo cu dda judío

rá ngū, por rá nguehcā, xí tsjih cā cjahni cā jin gui judio car evangelio. Nucā, xí hñemejū, cja xí ndötijū car salvación. Nu cā judio, bbū xta jñajū ur huenda digue cā hnahnō cjahni, ya xqui mpójmū ca xcá ndötijū car nzajqui ca jin da tjegue, da ndo dyojū, cja guejti-cā da guati car Cristo hneje. ¹²Como jin gá ne gá nguati jū car Jesucristo cā judio, eso, jin gá ndöti ca mí jonijū. Nu cā pé dda cjahni hua jar mundo, cā jin gui judio, xí provechabi cár tzi ttijqui ca Ocja, xí nguati jū car Jesucristo cja xí nuju rá ngū bendición. Bbū xta zōh car pa bbū xta hñeme cā judio hneje, más da ndo mpójmū göhtjo yū cjahni hua jar mundo, como más drá ndo ngū cā bendición da nuju, bbū.

La salvación de los que no son judíos

¹³Nuya, dí pehtzi algo dí ne gu xihquijū, nuquejū guí cjahnitjo, jin guí judiojū. Como xí ddajcō ca Ocja nám cargo nā dár nzoj yū cjahni yū jin gui judio, eso, dí mpegui, dí öti nar bbefi, sāntā da hñeme car Jesucristo rá nguquiguejū jin guí judiojū. ¹⁴Cja guejto dí mbēn cūm minga-israelitaje, bbū xta ccahti yū cjahni yū jin gui judio, ya xqui eme-yā, guejti cā dda israelita da mvidiabijū cja da hñemejū hneje. ¹⁵Por rá nguehcā xcá weguehui ca Ocja cā judio, ya xí jogui xí nguati guegue cā pé dda cjahni cā jí mí mpädihui ca Ocja máhmeto. Pe bbū xta hñeme car Cristo cā judio hneje, cja pé da guati jū ca Ocja, nubbū, da ndo mpójmū göhtjo yū cjahni hua jar jöy. Nubbū, ya xtrú ncja hua jar mundo göhtjo ca xí

mbēn ca Ocja da ncja. ¹⁶Dí pädijū, cierto du cojmū da jionijū ca Ocja cā cjahni israelita cā jí bbe i eme car Jesucristo. Como mí mejti ca Ocja cā ndom titaje, cā israelita cā mí bbū jár mudi, tiene que da cjajū í mejti ca Ocja hneje cā to rí hneje digue cár cji gueguejū. Ya xcú dyodejū, cam razaje, i tjequihui hnar za gá olivo. Bbū í mejti ca Ocja quí dyū car za, guejto í mejti quí dyē. Tzudi, göhtjo cam razaje da cja ur mejti ca Ocja.

¹⁷Cā dda judio cā jin gá hñeme car Cristo, i jñejmū cā dda quí dyē car za gá olivo. Nucā, bi ttojqui, pa bi njerta pū cā dda quí dyē ca hnahnō ur za ca yapū már jō. Cja nuquejū, guí cjahnitjojū, jin guí judiojū, guí jñejmū quí dyē ca hnahnō ur za. Cja nuya, guí tzijpjū cár vida car za gá olivo. Cā favor cā bi ttun cā judio máhmeto, guehuejū, guí pehtzijū ya-cā.

¹⁸Eso, jin gui tzö gui hñixtsjejū o gui despreciabijū cā judio cā i jñejmū cā dyезa cā bi ttojqui. Gui mbeni jū, jin gui guehuejū guí unijū ur nzajqui car za, como guí dyezatjojū. Gue car za i ddahquitjo quer nzajquijū.

¹⁹Pé ntoja i bbūh ca to da dādi: “Bi ttojqui cā dda dyезa pa gua cuatigö pū jar za.” ²⁰Cierto-ca. Ncjahmū xí dyen cā judio ca Ocja, como guegue-cā jin gá ne gá hñemebi cár tzi ttijqui. Cja nuquejū, i nuquijū rá zō ca Ocja, como gú hñemebijū cár tzi ttijqui. Pe jin gui ma gui hñixtsjejū. Mejor, gui penti quir mfenijū, cja gui ntzohmijū ja grí hmupjū rá zō. ²¹Ca Ocja jin gá jiøjqui cā dyезa,

bi dyojsqui, bi guhtzi pu jabu mí bbuy. Cja nuqueju, ncjahmu xcú cuatitjoju guegue, hnahño ur za pu jabu xcuí hñejmu. Bbu gui hñixtsjeju, jin da jiøquiquiju hneje. ²²Nuya dí ccahtiju, rá ndo zö ca Ocja, pe guejtjo hneje rá nttzupi. Cu judio cu jin gá ne gá hñeme, ca Ocja xí nzogui, ya jin gui nú rá zö. Nuqueju, guí cjahni jin guí judioju, xcú hñemebiju cár tzi ttijqui car Jesucristo, nuya, guehquiigueju xí cuajtiquiju ca Ocja. Bbu gui hmajtiju pu jár dye car Cristo, xquí hmupju rá zö, bbu. Pe bbu gui wembiju pu, nubbá ca Ocja da zoquiquiju hneje. ²³Nu cu judio, bbu pé xtu cojmu pa da jioniju ca Ocja, cja da dyópjiju cár perdón, ca Ocja da nú rá zö, cja pé da cuajti pu jabu xí ttzejqui. Nucá, í cjahni ca Ocja cu bi juajni ya má yabbu, eso, i padi ja drí dapi cár voluntad pa pé da guatiiju guegue. ²⁴Nuqueju, jin guí judioju, máhmeto jí mí cjahniquiju ca Ocja. Yapu ngár bbupju, nu ca Ocja bi nzojiquiju quir tzi møyju, bú tziqiju cja bi cjahqui í bajtziqiju. Hnixjmá cu judio cu bi juajni guegue pa di cjajpi í bajtzi, jin da zöjpi rá ntji pa pé du tzí-cu. Ca Ocja pé da cuajti cu cjahni israelita hua jabu mí bbujmaja, cja pé da nú co ni cár tzi ttijqui.

La salvación final de los de Israel

²⁵Dí ne gu xihquiju, hermano, hnar mfení ca jí bbe i fuadi. Dí xihquiju-na pa sunta jin gui hñixtsjeju cja pa jin gui majmu, guehqueju i ndo nequiju ca Ocja, nu cu cjahni israelita, ya jin gui ne-cu.

Yu pa-ya, cu cjahni israelita jin gui ne da hñemeju, écja güí hñeh ca Ocja car Jesucristo? Pe bbu ya xtrú nguati guegue-cá göhtjo cu cjahni cu jin gui judio cu da hñeme, nubbá, da hñeme cu israelita hneje. ²⁶Car pa-ca, drá ngu cu cjahni israelita da guatiiju ca Ocja, cja da hñemeju car Jesucristo. Nubbá, da zuh ca hnar palabra ca i mam pu jar Escritura, i ina:

Du eh ca hnar cjahni digue cu judio pa da möx quí minga-israelitaju,
Guegue da pötibi quí møyju cu cjahni cu guá hñeje digue cár cji car Jacob, da cjajpi da jioniju ca Ocja.

²⁷Bbu xta nigui car cjahni-ca, gu øhtibiju cum cjahni hnar ddadyo compromiso,
Gu cjahztibiju ca rá nttzo ca i tuju.

Ncjapu ga man ca Ocja pu jar Escritura.

²⁸Yu pa-ya, cu judio jin gui ne da hñemeju car ddadyo jña digue car Jesucristo, eso, xí weguehui ca Ocja, cja nuqueju, guí cjahnitjoju, xcú cuatiju. Pe ndejmá i nedí cu judio ca Ocja, cja i mbendi cu promesa cu bi xih cu ndo í titaju. ²⁹Bbu te i ddajquiju ca Ocja, ya jim pé da jñanguiju. Guejtjo bbu to xí xih hnar promesa, jin da hna pötítjo cár palabra. ³⁰Nuqueju, máhmeto, nim pa nguí padiju ja i ncja ca Ocja. Pe nuya, guegue xí cuajtiquiju cja xí núquiju rá zö, como ya xcú mbödihui cu judio cu jin gá ne gá hñemeju car Jesucristo. Jøntsjetjo por rá ngue cár tzi ttijqui, ca Ocja xí nguzquiju ca rá nttzo ca nguí

tuju. ³¹Nar tiempo ná dí bbupju ya, cù judio xí wembi ca Ocja. Pe ya xpa eh car pa bbu pé xtu ejmu, xta dyöjpítjoju ca Ocja cár tzi perdón, ncja nguquigueju xquí dyötiju. ³²Cu cjahni cù jin gui judio cja co hñeh cu judio, göhtjo xí ntóxtihui ca Ocja, cja xí dyötiju ca mí mbentsjeju. Ca Ocja göhtjo xí jiejmú xí dyötiju ncjapu, pa da bádiju, göhtjo jin gui jogui cjahniju. Cja diguebbu ya, pe xí nzojmú göhtjo, xí xijmú ja ncja da jogui drí guatiju por digue cár tzi ttijqui, pa da ccuhztibiju ca rá nttozo ca i tuju.

³³Cierto, ur jogui Cjáa ca Ocja. Rá ndo ngu cár ttijqui, cja rá ndo nte quí mfeni. I padi göhtjo ca xí ncja, cja co göhtjo ca te da ncja. Jin tema cjahni di mbení ncja ngu ga mbení ca Ocja. Jin dí padíju te i ne da mán cu xí dyöte. ³⁴Cierto nar palabra ná i mám pü jar Escritura:

Jin to da zóhtze da bádi ja ncja ga mbení ca Ocja,

Jin to da bádi da ungui consejo.

³⁵Jin to i bbuh ca di jogui di ma:
“Xtú cjajpigö hnar favor ca Ocja,

Cja nuya dí tóhmi da cozqui.”

³⁶Ca Ocja bi dyöte göhtjo yu i bbuy, xí un cár nzajquiju. Guejtjo i mandado göhtjo te i ncja. Ya xí mbení te da cjajpi göhtjo, cja ja ncja drí guadi. Xí dyöte göhtjo pa da ttihztibi guejtsje guegue. Gu xöjtibiju göhtjo cu cjeya cu ba eje. Amén.

La vida consagrada a Dios

12 Nuya, um cjuadaquiju, dí öhquiju gui mbeníju tzu, te tza ngu cu favor xí ddajquiju ca

Ocja, jéntsjetjo por rá nguehcá xcá nügуйu co ni cár tzi ttijqui. Eso, rí ntzöhui gui ndötsjeju jár dye pa dí mejtiqiju ca Ocja göhtjo ir vidaju. Gue nar ofrenda-ná da ñahibili ca Ocja yu to i joni göhtjo mbo ár møyju. ²Nuquigueju, ya jin gui hmupju como ngu cu cjahni cu rí den nár mundo. Gui dyöpjiju ca Ocja da pötiqui quir mfeniju, cja da ddahquiju hnár ddadyo hmuy. Da ncjapu grí nxödiju ja ncja grí hmupju pa da tzoh ca Ocja. Gui hmupju ncjapu, pa grí ccahtiju, te tza rá zö quí mfeni ca Ocja.

³Nuya, ya pé dda palabra gu xihquiju, dí ma porque ár jmandaderogui ca Ocja. Guegue-ca xí ddajqui nám cargo. Eso, dí nzohquiju, pa jin to da hñixtsje, cja jin to da hñexihui cár minga-hermanohui. Bbu guí pehtzi mfeni rá zö pa gui dyöte tema bbefi jar templo, gui mbení gue ca Ocja xí ddahqui cu mfeni-cú. Cada hnaaqiugueju, gui mbení tema cargo bi ddahqui ca Ocja bbu ngú hñeme, cja gui hmuy conforme car cargo-ca. ⁴Nugöju, hnaadi nám cuerpoju, pe i impejni rá ngu parte pa da zöte. I weh car bbefi ca i öte cada hnár parte nám cuerpoju. ⁵Hnecöju, como ngu xtá emeju car Cristo, dí ncjagöju pü hneje. Masque rá nguguiju, dí cjaju hnaadi car cuerpo, gue cár cuerpo car Cristo. Como hnaadi cam Tzi Jmuyu ca dí pejpiju, ya jin dí bbujtsjeju, dí mföixju, ncja ngu yí parte nám cuerpoju.

⁶Ca Ocja xí ddajquiju cada hnaaguiju hnam bbefi gu pejmu, cja i nesta gu ötiju-ca pa gu mföixju. I

bbuh car hermano ca xí ttuni mfeni pa drí nzoh cu pé ddaa, drí xijmu hnar ddadyo palabra ca rí hñeh ca Ocja. Ca to da ñq ncjapu, da xih cu pé ddaa hnar palabra ca da sirvebiju pa da zeh ca drí hñemeju. ⁷Car hermano ca xí ttun car bbefi pa da nú cu probe, da nú rá zö-cu. Guejti ca hnaa ca i tocabi da ujti cu pé dda hermano nár palabra ca Ocja, da unguí úr may pa da ujti rá zö. ⁸Guejti car hermano ca xí ttun cár bbefi pa drí nzoh cu cjahni pa jin da jieh ca rí deniju ca Ocja, guejti guegue da dyoti cár bbefi göhtjo mbo úr may. Ca to i un ca Ocja cár domi, göhtjo cor pöjö drí uni. Ca to i ttun car bbefi pa drí mandadobi cu pé dda hermano, i nesta da bädi ja ncja drí nú, cja ja ncja drí nzofo. Guejti car hermano ca i föx cu döhtji, da dyote göhtjo cor pöjö.

Deberes de la vida cristiana

⁹Gui madjiju yu pé ddaa yu i eme, göhtjo mbo ir mayju. Gui jiejmu cu cosa rá nttzo, cja gui unguí ir mayju gui dyotiju cu rá zö. ¹⁰Gui neju cu pé dda hermano ncjahmu mero ir hñohuiju, como hnaadi ca guí emeju. Gui nzojmu rá zö, cja gui respetaju. Jin gui töhmi guer hñohui da hñizquigue, pe guehuegui hñijtzib*u* quer hñohui. ¹¹Gui pepiju cam Tzi Jmuju göhtjo mbo ir mayju, como ngu gri madiju. Gui mpeguiju, jin gui ndajnitjoju. ¹²Gui mpojmu göhtjo úr tiempo, porque nuya dí padiju, gu ma grí hmupju ca Ocja. Gui tzejtiju bbu i tocaquiju gui sufriju. Jin gui jiejmu ca guí nzojmu ca Ocja. ¹³Gui föxju

cu pé ddaa hermano cu i ten car Jesucristo, bbu te i nestaju. Gui ccahtiju rá zö cu hermano cu to i tzøti pu jer nguju.

¹⁴Dyöjpi ca Ocja da möx cu to te i cjahqui. Gui dyöjpi da nú co ni cár tzi ttijqui. Jin gui ma gui tzan-cu.

¹⁵Jin gui jonquitsjegue gui mben ja grí hmuy rá zö. Bbu i mpöh quer minga-cjahnihui, gui mpöjö, hneje. Guejto, bbu i unguí úr dumuy, gui jujjqui cja gui jñuhtibi úr may. ¹⁶Gui hmupju rá zö cu pé ddaa.

Jin to da hñixtsje. Jin gui ma gui mben guehuegui guí ndo pädi. Jin gui despreciabi car cjahni ca jin tza i ja, o jin tza xcá nxödi. Gui madí cja gui fötzi. ¹⁷Bbu to i øjtiqui ca rá nttzo, jin gui cohtzibi. Gui mben ja grí dyöhtibi ca rá zö, pa göhtjo cu cjahni cu i ccajtiqui da bädi, rá zö gri ten ca Ocja. ¹⁸Gui dyöjpi ca Ocja da möxqui, pa drá zö guír hmub qui hñohui, cja co hneh cu pé dda cjahni, santaqu jin da nigui jueni o tujni. ¹⁹Um tzi hñohuiquipu, jin gui cohtzibiju ca to te di cjahqui. Bbu di bbuh hnar cjahni ca ndejmu da dyöjtiqui jueni o te pé hnar cosa rá nttzo, jin gui ntoxthihi. Gui töhmi ca Ocja da un ca rí ntzöhui. Porque i mä guegue pu jár palabra: “Guejcö i tocagui gu castiga yu to i öt*u* ca rá nttzo. Guejquigö xtá cohtzibi ca xí dyöjtiqui.” Ncjanu ga xijquiju ca Ocja. ²⁰Guejto i man cár palabra ca Ocja, inä: “Bbu i tuntju quer contra, gui uni ca te da zi. Bbu i tutje, gui uni tzu úr deje.” Bbu gui dyote ncjanu, pé ntoja xta mben ca xí cjahqui, cja da mehtzi úr tzö. ²¹Bbu gui cohtzibi hnar cjahni ca rá nttzo ca xí dyöjtiqui, hnehquigue guí

øtigue ca rá nttzo hneje. Ncjahmu xí ndaqui ca rá nttzo, bbú. Lugar digue gui cohtzibí ca rá nttzo, gui dyøhtibi ca rá zö. Da ncjapu grí tajpi qui nttzomfeni.

Deberes a las autoridades civiles

13 Nuquejü, xcú hñemejü car Jesucristo, gui dyøjtijü ca da bbejpiquijü cü to i pehtzi í cargo, cja gui hñihtzibiju. Porque ca Ocja xí hñitzi göhtjo cü autoridad cü i pehtzi qui cargo. Guegue xí ma, da hmuh cü cjahni cü da mandadoguijü hua jar jöy. ² Ca to da zan cü autoridad o da ntøxtihui, ncjahmu i ntøxtihui ca Ocja hneje. Guejtjo, bbü gui tøx cü autoridad, da ttahqui hner castigo. ³ Bbü guí öti ca rá zö, jin guí nesta gui tzü da ncastigaqui. Gue cü cjahni cü i öti ca rá nttzo, i castiga nur autoridad. Bbü jin guí ne da ncastigaqui, i nesta gui hmuy rá zö; nubbü, jin gui ntzü bbü. Bbü gui hmuy rá zö, gui mpøjmi car autoridad, cja jin te da cjahqui. ⁴ Gui mbenijü, ca Ocja xí un yü autoridad qui cargojü pa gu hmüpju rá zö hua jar jöy, gu mijtijü. Pe bbü gui contrabi car ley, rí ntzöhui gui tzü, bbü, porque ca hnáa ca i mandado, i pehtzi úr ttzedi da castigaqui. Ncjahmu xí ngo úr lugar ca Ocja pa da mandado hua jar jöy, cja pa da castiga yü cjahni yü jin guí ne da dyöti ca rá zö. ⁵ Eso, i nesta gu öjtijü yü autoridad pa jin da ddajquijü tema castigo, cja guejtjo porque dí padijü, xpá hñeh ca Ocja cár cargo ca i pehtzijü. Bbü gu öjtijü-cü, jin da nesta te gu mbenijü. ⁶ Ncjadipu hneje, i nesta gu cjutijü

cü contribución pa drí sostene car gobierno, como ca Ocja xí hñix cü autoridad pa da nuguijü cja da mandadoguijü pa gu hmüpju rá zö.

⁷ Gui cjutijü göhtjo ca te guí tujü. Ca to guí tujpijü contribución, gui cjuhtijü-ca. Hneje ca to guí tujpijü impuesto, gui cjuhtijü-ca hneje. Guejtí cü autoridad cü i mandadoquijü, i nesta gui hñihtzibiju cja gui dyøjtijü. ⁸ Jin to guí tuhtzibiju tjöy. Gui cohtzibiju cár domi cü to di jmihquijü. I nesta göhtjo úr tiempo gu nújü rá zö cü hñohuijü. Car cjahni ca i mah cár hñohui, i zöjte göhtjo ca i mam pu jar ley. ⁹ I bbüh ca hnár mandamiento ca i xijquijü: “Gu neju cü hñohuijü ncja ngü dar netsjejü.” Bbü gu ötijü ncja ngü ga man car mandamiento-cá, jin gu tzöju drá ntji pa gu ötijü ca i man cü pé dda mandamiento hneje. I bbüh cü ddáa cü i mah ncjahua: “Jin da yohti bbejñä car hñojø, cja car bbejñä jin da yohti dame. Jin gui pöhtite. Jin gui mpe. Jin to guí ñajquibi bbtjri. Jin gui neciobi tema cosa ca jí ir mejtigue.” ¹⁰ Ca to i mah cár hñohui, jin gui øhtibi ca rá nttzo. Eso, ca to i ne cár míngä-cjahnihui, i zöjte göhtjo ca i man car ley.

¹¹ Gui mbenijü göhtjo yü palabra yü xtú xihquijü, Guejtjo gui mbenijü ja ncja nár tiempo ná dí bbüpju. Ya xí nzuh car hora pa guí tzöju cja gui ntzohmijü ja ncja grí hmüpju. Ya jin gui hmüpju ncja ngü nguír hmüpju bbü cja ngui fudi ngui emejü. Gu mbenijü, ya xta nigui car pa bbü xtú eh cam Tzi Jmijü. Nubbü, cja xtá nügöjü ca dí tóhmijü. ¹² Ya xní tjoj nur xuy,

ya xní ma da nigui. Ya xní ntzöhui gu jeguijü cù cosa rá nttzo cù ndí ñtijü bbü ndí bbüpju jar bbexuy. Nuya, gu hmüpju jár tzi jiahtzi ca Ocja. Gu mfödijü ncja ngü hnar sundado ca i ntujnihui cár contra, cja i mföjtse pa jin da hnapi. ¹³Gu hñojü rá zö, pa da nigui, dí bbüpju jar jiahtzi. Jin gu dé gu tzöjü mbaxcjua, cja jin gu ntijü. Jin gu jñeguijü da daguijü nttzomfeni, cja jin gu ñtijü hmetzö. Guejto, jin gu huénijü cja jin gu huihtzijü cum minga-cjahnjü. ¹⁴Eso, dí nzohquijü ya, pa gui jiejmü göhtjo cù cosa rá nttzo cù ngui ñtijü máhmeto. Bbü ba eh quir mfeniju rá nttzo, ncjá cù mí equijü máhmeto, jin gui cjapijü ncaso. Gui nxödijü gui hmüpju car ddadyo hmüy ca xí ddajquijü car Jesucristo.

No critiques a tu hermano

14 Bbü di bbüh hnar cjahni ca i eme car evangelio, pe jí bbe i nzeh ca rí hñeme, gui recibijü gá hermano. Pe bbü i bbüy tengü asunto pü jabü hnahño ga mbení guegue, hnahño gri mbënguejü, jin gui dé gui mbömbihui palabra. ²I bbüj nühermano nü i mbení da jogui gu tzijü göhtjo tema jñuni ca dí nejü. Cja pé i bbüh car tzi hermano ca i yomfeni, ga ma, jin gui tzö gu tzajü ngø, certa xtrú jñahtibi tema ídolo, eso, jin gui ne da zi jñuni gá ngø. ³Car hermano ca i tza ngø, jin da xifi ür dondo ca hnáa ca jin gui ne da za. Guejti ca hnáa ca jin gui tzi jñuni gá ngø, jin da zohmi car hermano ca i tzi göhtjo tema jñuni. Jí rí ntzöhui gu tzohmigüjü car cjahni ca xí recibi

ca Ocja, como guegue-ca i nü rá zö. ⁴Nuquigue, jin guí pehtzi derecho gui jñampi ür huenda cár mafi quer vecino. Bbü jin gui tzö ca xí dyöte, ya xi ür huenda cár jmu. Guegue-ca da nzofo. Guejto bbü xí dyöti ca rá zö, guejti-ca, ür huenda cár jmu. Bbü guí ne gui tzohmi quer hñohui, como guí ina, jin gui tzö ca i òte, gui mbentjo, bí pah ca Ocja te rá nguehcä ga dyöte ncjapü. Guejto i padi ja ncja da möx car cjahni-ca pa da hmüy rá zö cja da zedi drí hñeme.

⁵Nuya, pé hnar ejemplo gu ddahquijü ya. I bbüh cù ddaa cù i ma, más rá nttzujpi ca hnar pá nin drá ngue ca pé hnaa. Cja pé i bbüh cù ddaa, i majmu, ddaguutjo göhtjo yü pa. Cada hnaagöju, gu ntzohmijü ter beh cä dí mbeníjü digue yü pá, cja gu ñtijü ca rá zö, como ngü xtá mbeníjü. ⁶Ca to i tzujpi ca hnar pa, i embi pa da mbení ca Ocja car pa-ca. Guejti car hermano ca jin tema pa i tzujpi, i òte ncjapü, porque ga ma guegue göhtjo yü pá i jñejtjo ga mbení ca Ocja. Car hermano ca i tzi göhtjo tema jñuni, bbü i tza ngø, ndejma i ihtzibi ca Ocja, como guehcä i öjpi mpöjcje ante que da zi. Guejti car hermano ca jin gui ne da za ngø, i jeh-ca, pa más da ttihztzibi ca Ocja, cja guejti guegue i öjpi mpöjcje ca Ocja digue ca da zi. ⁷Nugöju, como ngü xtá emejü car Cristo, ya jin dí bbütsjejü, cja jin gu tutsjejü, hneje, como guegue i mandadoguijü göhtjo ür tiempo. ⁸Menta dí bbüpju, dí jonijü ja grá tzöpju ca Ocja, cja bbü xtá tujü, gue ca Ocja da guxquijü hua jar mundo. Masque

gri bbujiju o bbu ya xcrú tuju, í mejtiguiju guegue. ⁹Cam Tzi Jmuu Jesucristo bi du, cja pé bi jña ár jña, pa bi cjagui í mejtiguiju göhtjo ur tiempo. Nuya, í mejtiguiju göhtjo cu cjeya gu hmupju hua jar jöy. Guejtjo bbu ya xcrú tuju, guegue da mandadoguiju pu jabu xcrá möjö.

¹⁰Por eso, dí xihquiju, jin gui tzohmi guer hñohui masque hnahnó gri mbungue, hnahnó ga mbuneni guegue, cja jin gui despreciabi. Gu mbeniju, dí göhtjoju, gu ma hmöpju delante car Danzöya, cja guegue-cu da jñanquiju ur huenda. ¹¹Nubbu, xta ncujá ncja ngu ga man ca Ocja pu jár palabra, i inqa:

Nugö, dí bbuh y göhtjo ur tiempo,
cja ntjumu da ncja ca dí mu,
Göhtjo cu cjahni du ejmu,
da ndandñiñajmu pu jam
hua, cja göhtjo da xijquiju:
“Guehquigue, gú Ocja-gue, dí
izquije.”

¹²Nubbu, cada hnaaguiju gu döjtiju ur huenda ca Ocja, gu xijmu guegue göhtjo ca xtú otiju.

No hagas tropezar a tu hermano

¹³Eso, dí xihquiju, ya jin gu tzohmiju cum minga-hermanoju. Mejor gu ntzohmitsjeju num vidaju, cada hnaaguiju, pa jin to gu øhtibiju estorbo. ¹⁴Nugö, dí padi por digue cár tzi pöjötjo xí salvagui cam Tzi Jmuu Jesús, cja por rá nguehca, i núgui rá zö car Tzi Ta jitzi. Eso, dí padi, jin te i ccahtzi ca Ocja digue yu dí tziju, como jin gui ccahti rá nttzo tema alimento. Nu car hermano ca i inqa, i bbuh cu dda alimento cu i ccax ca Ocja,

bbu da zi guegue cu jñuni-cu, da ndujpite. ¹⁵Nuquigue, masque guí mangue hneje, jin te i ccaxquiju ca Ocja, bbu gui yojmi hnar hermano ca i mu, jin gui tjeguiju gu tziju cu dda jñuni, nuquigue, gui jieh-cu hneje, pa jin gui cjajpi da ungui ur dumh y o da jieh cár hñu ca Ocja. Bbu gui tzitjo, masque guí padi, i øhtibi estorbo ca hnáa, ncjahmu guí despreciabi car hñohui-cu. Gui ntzohmi, jin tza te i muhui hnar jñuni, hnixjmaja, car Cristo bi du por rá ngue quer hñohui. ¹⁶Pé ntoja guí inqa, dí pehtziju derecho gu tziju ca te dí neju. Ciento, guí pehtzi derecho, pe i nesta gui mbeni, puede da ccajtiqui quer hñohui, eso, guí jña ur huenda pa jin gui xøjpi da dyoti ca jin gui tzö. ¹⁷Dí ndo bbupju rá zö ca ya xtá cuatiju jár dye car Jesucristo. Pe jin gui gue ca dí tziju da pöjpigui yuñ tzi muyju. Nu ca i ddajquiju car pöjö, guehca dár yojmu car Tzí Espíritu Santo, cja nucá i fôxquiju pa gu øhtibiju ca rá zö cum hñohuiju, cja gu hmupju ca Ocja. ¹⁸Car hermano ca i mbeni ja ncja da möx cár hñohui cja jin gui ndo cja ndumu digue cu cosa cu jin gui importa, guegue i pejpi car Cristo cja i tzöpi car Tzi Ta jitzi. Guejtji cu pé dda cjahni cu i ccahtibi cár vida, da badiju, rá zö ga nden ca Ocja car hermano-cu.

¹⁹Ncjá ya, gui jioniju car manera ja grí hmupju pa jin tema estorbo gui dyøhtibiju quir hñohuiju. Gui hmupju-cu pa gui fôxju da zedi drí den car Jesucristo. ²⁰Bbu gui tziju hnar jñuni ca i man cu dda hermano, jin gui tzö da ttzi, certa gui dyøhtibiju estorbo car tzi cjahni

ca cja i fudi i eme nar evangelio. Ciento, i jeguijü ca Ocja gu tzijü ca te dí neju. Pe bbü guí ohtibi estorbo quer hermano pa da jieh ca rí den nár hñü ca Ocja, nubbü, guí tu quer nttojqui, bbü. ²¹Mejor jin gu tzajü ngö, jin gu tzijü vino, cja jin tema cosa gu otiju ca di dyothibi estorbo hnar hermano, o di xöjpi di dyoti hnar cosa rá nttozo, cja ya jin di den cár hñü ca Ocja. ²²Nuquigue, bbü guí padi, ca Ocja ya xí bendeci car jñuni ca guí tzi, jin guí nesta gui pöti quer mfeni. Bí janti ca Ocja ja ncja dar mbenijü mbo um tzi muyü. Pe guejtjo jin gui nesta gui tapi cár voluntad quer hñohui, pa da dyote ncja ngü gri dyotigue. Bbü jin guí yomfeni digue ca guí øte, guí bbüy rá zö, bbü. ²³Pe bbü guí yomfeni, cja da jogui gui tzi car cosa ca i jñajtiqui? mejor jin gui tzi, pa gui padi mbo ir møy, i tzoh ca Ocja ca guí øte. Porque bbü guí yomfenijo, cja ndejma qui tzi, guí ndujpite, bbü, como guí mä mbo ir møy, jin gui tzö ca guí øte, cja ndejma guí øtitjo.

Agrada a tu prójimo, no a ti mismo

15 Nugöjü, como ngü xtá zedi xtá emejü cár palabra ca Ocja, ya jin gui tzö gu hmüjtsjeju. Gu mbenijü ja ncja gár hmüpju pa gu föxju cü ddaa cü cja i fudi i emejü. ²Cada hnaagöjü, gu mbenijü ja gár hmüpju pa da tzoh cum hñohuiju, sánta da zeh ca drí hñemejü. ³Guejtí car Jesucristo, cam Tzi Jmujü, jin guá mbentsje ja drí hmüjtsje rá zö. Guegue bi zejti göhtjo ca bi ncrajpi, pa bi tzöpi cár Tzi Ta jitzi. Bbü mí sufri car Jesús,

bi züh ca i mäm pü jár palabra ca Ocja, ina: "Nuque, um Tzi Taqui, cü cjahni cü i aQui, xí ndo nzanguigö." ⁴I jux pü jár palabra ca Ocja ter beh cü bi ncja cü cjeya cü xí tjogui. I xijquijü ja bi ncja ca Ocja gá möx cü cjahni cü mí teni. Göhtjo cü i tjux pü jar Escritura i sirvegujü pa grá pádijü, guequitjogöjü, ca Ocja da möxquijü pa gu tzejtijü ca te dí nesta gu sufrijü, cja pa jin gu jejmü ca dár emejü car Jesucristo. Eso, bbü dí mbenijü ca i mäm pü jár palabra ca Ocja, dí tóhmijü gu nýü ca xí prometeguijü guegue. ⁵Hnëhquiguejü cam Tzi Tajü jitzi da möxquiguejü hneje pa gui tzejtijü ca te gui tjojmü cja jin gui jiejmü ca guí hñemejü. Guejtjo da möxquijü co ni cár tzi ttijqui pa gui hmüpju cor pöjö, como hnaadi cam Tzi Jmujü guí yojmü, gue car Jesucristo. ⁶Da ncjapü grí nxödijü gui mföixijü, jin gui huenijü cja jin gui weguejü. Nubbü, dí göhtjoju gu ihtzibijü cam Tzi Tajü jitzi, yojmi cár Tzi Ttu, gue cam Tzi Jmujü Jesucristo, por rá nguehcä guí hmüpju rá zö.

El evangelio anunciado a los que no son judíos

⁷Gui nccahtitsjeju rá zö, hna ngü hnaa, como ngü car Cristo bi ccajliguijü co ni cár tzi jmajte, bbü ndú cuatiju guegue. Da ncjapü drí ttihzibi cam Tzi Tajü jitzi. ⁸Gui mbenijü nar palabra na dí xihquijü, car Jesucristo bú ecua jar jöy ncja hnar mafi, hnë di möx cü judío cja co hnëh cü cjahni cü jin gui judío. Bú eje bi cumpli cü promesa cü xquí tsjih cü ndom titaje ya má yabbü, cja pa di un car salvación yü

judio. Bi ncjapu gá nigui, i cumpli ca Ocja göhtjo ca i ma. ⁹Guejti cu cjahnitjo cu jin gui judio, bi tsjjimu di jogui di guati ca Ocja por guegue car Jesucristo, pa di dötiju car nzajqui ca jin da tjegue. Ncjanu gá nzuh ca hnar palabra ca i jux pu jar Escritura, pu jabu i ma, guejti cu cjahni cu jin gui judio da nuju cár tzi ttijqui ca Ocja cja da xöjtibiju. I ina:

Nugö, xtá ma pu jabu i bbuh cu hnahnó cjahni cu jin gui meyaqui,

Xtá mpejnije-cu pa gu xöjtiquije, dí göhtjoje.

¹⁰Cja guejti ca hnanguadi i ma:
 Gui mpöjqueju, guí cjahnitjoju,
 cja gui mpejniju co ni quí
 cjahni ca Ocja.

¹¹Guejto pé i ma pé hnar parte:
 Nuqueju, guí cjahnitjoju, guí
 xöjtibiju ca Ocja,
 Göhtjo yu cjahni hua jar jöy da
 majmu, te tza rá zö cam Tzi
 Jmuju.

¹²Cja guejti car profeta Isaías i ma
ncjadipu, i ina:

 Da hmuh ca hnar cjahni ca drí
 hñeje digue cár cji car Isaí,
 Du eje pa da mandadobi cu
 cjahni cu jin gui judio,
 Cja göhtjo yu cjahni hua jar jöy
 da guati pa da ccahtiju, ja drí
 möxju guegue-cu.

¹³Cam Tzi Taju jitzi i un ca rá
zö göhtjo cu to i töhmi. Dí öjpi da
möxquiju pa guí segue guí hñeméju
car Jesucristo, guí hmüpju rá zö
quir hñohuiju, cja guí mpöjmu,
göhtjo mbo ir muyju. Como guí
yojmu car Tzi Espíritu Santo, guejti
guegue da möxquiju pa guí pudiju,

cierto rá ndo zö ca da ddahquiju ca
Ocja.

¹⁴Nuqueju, um cjuudaquiju, dí
pudi, guí jogui cjahniju, cja guí
pehtziju mfuni, eso, guí pudi guí
nzojsjeju pa guí segue guí teniju
nár hñu ca Ocja. ¹⁵Pe ndejma
xtú tzö um muy, xtú juxcuá
tengu palabra gá consejo, pa gu
mbembiquiju, masque pé ntoja ya
xquí pudiju yu xtú xihquiju hua.
Porque gue nám bbefi-nu xí ddajqui
ca Ocja, ca dár nzoh cu cjahni cu
jin gui judio. ¹⁶Dí xijmu nár tzi
ddadyo jñu digue car Jesucristo.
Ncjanu dí pejpi guegue-cu, dí
xihquiju ja ncja guí tötiju car
nzajqui ca jin da tjegue, porque
dí ne gu presentabi cam Tzi Taju
pu jitzi rá ngu cu cjahni cu jin gui
judio cu xtrú hñemébi cár Tzi Ttu.
Göhtjo-cu da yojmu car Espíritu
Santo, cja ya xta hmuy limpio quí
tzi muyju. Dí tzö um muy, da pujpi
cam Tzi Taju jitzi cu cjahni-cu. Da
jñejmu hnar ofrenda drá tzi zö.

¹⁷Nugö, dí pehtzi te gár mpöjö,
gue nám bbefi nu xí ddajqui
cam Tzi Jmuju Jesús. Guegue bi
hñixquigö pa gu pejpi ca Ocja.

¹⁸Jin dí ñagö digue tema cosa ca
xcrú otitsjegö, jøntsje ca dár pejpi
car Jesucristo, cja guegue xí cjajpi
xí joj nám bbefi. Eso, rá ngu cu
cjahni cu jin gui judio xí hñeme
nár palabra ca Ocja. Xtú nzojcö
gá palabra, cja guejto co ni ca dí
óte, xtú ujti-cu ja i ncja cár hñu ca
Ocja. ¹⁹Como dí yobbe car Espíritu
Santo, guegue xí möxqui xtú óte
rá ngu clase milagro. Dú fudi dú
tungui nár evangelio pu Jerusalén.
Guejto du ma du tjogui rá ngu

jñini, hasta dū tzötí jar lugar ca i tsjifi Ilírico. Göhtjo cù lugar pù jabu xtú hño, dá tungui nár evangelio, dá nzofo göhtjo cù cjahni cù mí bbuh pù. ²⁰Como dí ungui um møy gu má nár tzi ddadyo jñä digue car Jesucristo pù jabu jí bbe i fadi, dí segue dí dyo pù jabu jin to bbe i tzöte pa da xih cù cjahni. Jin dí ne gu peh pù jabu ya xí ñati pé hnar cjahni cja ya xí fujti car bbefi, pa jin to da hñinä dí huihtzibi cár bbefi. ²¹Dí ne gu pejpi ca Ocja pù jabu jí bbe i ttzoh cù cjahni, pa ncjapu da ncumpli nár tzi palabra na i jux pù jar Escritura. I inä:

Da dyoh cù cjahni cù jí bbe i ttzofo, da tsijimü digue ca hnáa ca du pejni ca Ocja. Cù hnahnö cjahni cù jí bbe i tsjifi ja i ncja guegue, da bádi rá zö.

Pablo piensa ir a Roma

²²Guehcä xtá dé, xtá hñogö, xtá nzoh cù cjahni, eso, jin tema tiempo xtú pehtzi gua ma grí ccajtiquijü, masque ya xí cja tiempo xtú mbení gu ma pù. ²³Pe nuya, ya xtú cjuajti nám bbefi hua jabu dí bbuy. Dí ingö, ya xí nzuh car tiempo gu ma pù jar ciudad pù Roma, como ya má yabbu xtá mbengö-ca. ²⁴Nuya, dí mbení gu má grí ccajtiquijü bbu xcrá ma pù España, cja bbu xtá tzöti pù jabu gár bbupjü, gu hmupjü tzü. Diguebbu ya, bbu xtá pøngö pù, da jogui gui föxquijü tzü co hnar ayuda pa gu ma gár ma pù España. ²⁵Pe nuya, gu má pù Jerusalén, gu jahtzibi hnar ayuda cù hermano cù rá bbuh pù. ²⁶Nu cù hermano

cù rá bbuh pù Macedonia cja co pù Acaya, ya xí mbeníjü da möx cù dda hermano cù bí bbuh pù Jerusalén. Xí jmuntzibijü hnar ofrenda, porque nucü, rá pehtzi necesidad. ²⁷Gueguejü co cár tzi pöjöyü xí mbentsjejü da möxjü cù hermano-cù. Ciento, cù hermano cù jin gui judio, ncjahmü i tujpi hnar favor cù hermano cù judio, como mür judio cam Tzi Jmujü Jesucristo, cja xcuí bóm pù jár jöy cù judio nár tzi ddadyo jñä. Cù hermano cù jin gui judio xí nujü rá ngü bendición por rá ngue nár palabra ca Ocja, eso xí mbentsjejü, rí ntzöhui da möxjü cù hermano israelita, como guegue-cù i pehtzi necesidad yü pa-ya. ²⁸Eso, bbu ya xcrú döjtigö car ofrenda cù cjuada pù Jerusalén, dí ne gu ma pù España, gu ma grí tjoh pù jabu gár bbupjü, gu ma grí zenguaquijü cja diguebbu ya, gu ma pù España. ²⁹Dí pàdi, bbu xtá tzöti pù jabu guí bbupjü, gu mpöjmü, dí göhtjojü, cja cam Tzi Jmujü Jesucristo da ddajquijü rá ngü bendición.

³⁰Nuya, um cjuadäquijü, dí öjquijü gui nzojmü tzü ca Ocja por rá nguejquigö, como hnaadi cam Tzi Jmujü Jesucristo xtú cuatijü, guejtjo hnaadi car Espíritu Santo i föxquijü pa gu majtsjejü. Jin gui jiejmü ca grí oraguijü, menta dí øhtibi cár bbefi ca Ocja. ³¹Gui dyöjpjü tzü da mezquigö rá zö, pa jin te da cjagui cù cjahni pù Judea cù i ühui car evangelio. Guejtjo gui dyöjpjü por rá ngue cù hermano pù Jerusalén, pa da tzöjmü car ayuda ca gu jahtzibijü. ³²Bbu da bøni rá zö nár asunto-nü, nubbü, da jñü

um may. Cja diguebbu ya, pé gui dyöjpju cam Tzi Taju, da zixqui rá zö pu jabu guí bbupju, pa gu nccahtiju tzu cja gu mpójim. ³³ Ca Ocja da möxquiju pa gui hmupju rá zö, guí göhtjoju. Amén.

Saludos personales

16 Nuya dí xihquiju, gui recibiju rá zö car hermana Febe. Ya xta ma pu jabu guí bbupju. Guegue i pe jar templo pu jar jñini Cencrea. ² Gui cuajtiju, cja gui ccahtiju rá zö, como nuqueju, xcú hñemeju car Jesucristo, cja guegue i pejpi-cá. Gui föxiju cja gui uniju ca te da nesta, porque guegue xí ndo möx cü pé dda hermano, guejtigö, xí möxqui hneje.

³ Dí pempí nzengua car Priscila hne car Aquila. Ndí yojme-cü, ndí mfökje ndí pejpije cam Tzi Jmuju Jesucristo. ⁴ Bbu di jinä gueguehui, ya xtrú bböjtigui. Dí ndo öjpi cjamädi ca Ocja por rá nguehcü, cja jin gui jønguuitsjegö dí gradece. Guejtjo hneje göhtjo cü hermano cü jin gui judio i öjpi mpöjcje hneje, como guejcö xtú xijmu car evangelio. ⁵ Guejtjo dí pempí nzengua hneje cü hermano cü i jmuntziju pu jár ngü car Priscila co car Aquila. Guejtjo gui xih cam tzi amigo Epeneto, dí pempí nzengua. Nuçá mür primero cü mingü pu jar Estado de Asia cü bi hñeme car evangelio cja bi den car Jesucristo. ⁶ Guejtjo, gui zenguaju tzu car María, guegue-ca xí ndo pejpi ca Ocja pu jabu guí bbupju. ⁷ Hneti car Andrónico co car Junias, um minguje, dí pempí nzengua hneje. Nugöje, bi cjoquije födi-cü.

Quí apóstole cam Tzi Jmugöju i meya cü hermano-cü cja i ihtzibiju. Gueguehui bi hñeme car Cristo ante que gua emegö.

⁸ Guejtjo hne, gui zenguaju tzu car hermano Amplias. Dí ndo ne car hermano-cá. ⁹ Guejti car Urbano, ca ndí hñobbe, ndí pejpibbe car tzi Jesucristo, cja hnëh car Estaquis, um amigo-ca. ¹⁰ Dí xihquiju hneje, gui zenguaju tzu car Apeles, ca i ndo ten car Cristo. Guejtjo gui zenguaju quí familia car Aristóbulo. ¹¹ Hneti cam minguje, car Herodión, cja co quí familia car Narciso cü i ten cam Tzi Jmuju Jesucristo, gui zenguaju-cü hneje. ¹² Zenguaju car Trifena co car Trifosa. Guegue-cü i pejpi cam Tzi Jmuju, cja co hnëh car tzi hermana Pérsida, como guejti guegue xí ndo pejpi cam Tzi Jmuju. ¹³ Hneti car Rufo gui zenguaju, como i ndo eme car Jesucristo cja i pejpi rá zö, cja gui zenguaju hneje cár me, como ncjahmu um megö-ca hneje. ¹⁴ Guejtjo dí xihquitjoju gui zenguaju tzu car Asíncrito, co car Flegonte, hnëh car Hermas, guejti car Patrobas co ni car Hermes, cja co cü pé dda cjuadä cü i bbubi-cü. ¹⁵ Guejtjo gui zenguaju tzu car Filólogo, cja co car Julia, guejti car Nereo co cár ncju, cja guejti car Olimpas, co göhtjo cü pé ddaa cü i eme ca Ocja cja i bbubi cü hermano-cü. ¹⁶ Guí göhtjoju gui nzengua cor ttijqui. Göhtjo cü hermano cü xí hñeme car Jesucristo cja rá bbu hnahnö jñini, göhtjo pu jabu rá bbu templo, i penquiju nzengua.

¹⁷ Dí xihquiju, um cjuadäquiju, gui jñaju ur huenda digue cü

cjahni cu i ne da juequiju o i ne da dyøjtiquiju estorbo. I xihquiju pé hnahnó ur mensaje ca jin gui jñejmi car palabra rá zö ca xí ttuqtiquiju. Nugueju, jin gui jñeguiju da jiöhquiju-cu. ¹⁸Cu cjahni cu i øte ncjapu, jin gui pejpi cam Tzi Jmuju Jesucristo, cja jí xcuá hñejmu guegue. I øti ca i mbentsjeju. I majimu palabra ncjahmu rá ndo zö, pa da johtitjo cu to i øde, cja pa drí jiöti cu cjahni cu jin tza i paj nár hñu ca Ocja. ¹⁹Dí mpöjcö ca xtá øde, guí tendiju car palabra ca ntjumuy. Cja dí negö, gui segue gui hmupju listo pa gui dyøtiju ca rá zö, pe jin gui cjadi møyju cu to i ne da ujtiquiju gui dyøtiju ca rá nttzo. ²⁰Dyo guí øtiju cu cjahni cu i ne da juaquiqui quir mfeniju. Cam Tzi Taju jitzi xí möxquiju pa xcú tötiju ca rá zö, cja da segue da möxquiju pa jin to da jiöhquiju, pe gui tapiju ca Jin Gui Jo. Guejti cam Tzi Jmuju Jesucristo da möxquiju co ni cár tzi ttijqui pa gui hmupju rá zö.

²¹I zenguaquiju nur Timoteo, nu dí yobbe jar bbefi, hnej nur Lucio, hnej nur Jasón, co nur Sosípater. Nuyu, um minguje-yu.

²²Nugö, dûr Tercio, xtú øhtibi nur Pablo nar carta-na. Dí zenguaquiju gá hermano, como hnequigö dí eme car Jesucristo.

²³Hnej nar Gayo i zenguaquiju. Dí oh pûr ngu guegue-nu. Guejto hne, xí jmijquije cár ngu pa dár jmuntzije pu. Guejto i zenguaquiju nur Erasto. Guegue-nu ur tesorero nur jñini hua jabu dí bbupje. Guejti nur hermano Cuarto i zenguaquiju.

²⁴Cam Tzi Jmuju Jesucristo da nuquiju co cár tzi jmajte, göhtjoquiguëju. Amén.

Alabanza final

²⁵Gu xojetibiju ca Ocja. Desde bbu mí muj nur mundo, ya xquí mben car Tzi Ta jitzi di mejni cár Tzi Ttu di ddajquiju car nzajqui ca jin da tjegue. Cu cjeya rá ngu cu xí tjogui, jí mí fah car mfeni-cau. Ddatsje ca Ocja mí padí. Guegue da möxquiju pa gui hñemebiju cár palabra göhtjo mbo ir møyju. ²⁶Máhmeto bi tsjih cu dda quí jmandadero ca Ocja ter beh ca di ncja, cja nucá, bi jñux pu ja Escritura, pe jin gá xijmu cu pé dda cjahni. Pe nuya, xí mandado ca Ocja xcá tsjifi göhtjo yu cjahni hua jar jöy nar tzi ddadío jña, pa da dyødeju cja da hñemebiju cár Ttu. ²⁷Ddatsje ca Ocja i bbuy, cja rá ndo nte quí mfeni. Por rá ngue car Jesucristo cja co göhtjo ca xí dyøte, da tsjöjtibi car Tzi Ta jitzi göhtjo cu cjeya cu ba eje, ni jabu drí tjegue. Da ncjapu, amén.

I ttzedi hua nar carta-na.